

Hospital ta informa tocante situacion di sistema di koeling na toren B

Penelope Tromp-Gomez, Division Manager Payment Systems:

'Conoce ^{BO} Banco Central' lo ta dia informativo y tambe constructivo y familiar



ORANJESTAD (AAN): Diaranson di e siman aki, Banco Central Aruba (BCA) a yama un conferencia di prensa den cual a duna informacion tocante e evento cu lo tuma lugar dia 22 di November venidero, yama: "Conoce ^{BO} Banco Central" cu e novedad cu pa prome biaha BCA ta habri porta pa ricibi henter comunidad, riba un dia informativo y familiar. Señora Penelope Tromp-Gomez, Division Manager Payment Systems, Treasury & Banking Operations di BCA, a hiba palabra na prome lugar, y a comparti cu prensa y comunidad algun informacion di loke e actividad aki ta encera, y pa cual el a haci un invitacion hopi special.

"Pa prome biaha Banco Central di Aruba lo habri su portanan pa comuni-

dad henter. Den cuadro di e trayectoria di actualizacion nos identidad, nos ta reconoce e importancia pa nos ta mas cerca ainda di nos comunidad. Y p'esey mes nos kier reforza e lazonan aki. Di e manera aki nos ta bay habri nos porta, manera mi a bisa y den un ambiente familiar y interactivo, nos ta desea pa tur hende, grandi y chikito, por bin conoce e Banco Central, con nos ta haci nos trabao pa proteha e balor di nos florin, mantene estabilidad financiero, supervisa institucionnan financiero, y tambe brinda e seguridad cu pagonan na Aruba ta tuma lugar na un manera eficiente y tambe confiable", Tromp-Gomez a relata. E actividad ta hiba e nomber "Conoce ^{BO} Banco Central" y lo tuma lugar dia 22 di November venidero.

Entrada hudicial na Dakota cu dos detencion relaciona cu bendemento di droga

ORANJESTAD (AAN): Di ahuebs den oranan di atardi Unit Narcotica tabata tin un entrada hudicial na un percela na Appelsinastraat na Dakota. E entrada hudicial tabata den cuadro di bendemento di droga den gran forma. Na e sitio a detene dos persona hende homber di inicialnan T. naci na Aruba. A haya un cantidad grandi di cocaina y placa. A confisca tur esakinan pa mas investigacion. Durante e entrada hudicial a haci uzo di teamnan di RRT, K 9 Unit, polis uniform di Noord y playa conhuntamente cu Flex Team. NO ta descarta cu lo por tin mas detencion pa e caso aki.



E tin apenas 18 aña

Hoben condena na 15 luna di prison pa intento di mata cu auto

Señora Valerie Figaroa:


Biblioteca Nacional Aruba den colaboracion special cu NV Elmar pa Festival di Buki pa Mucha 2025



ORANJESTAD (AAN): Señora Valerie Figaroa, Coordinador di Festival di Buki pa Mucha, den conferencia di prensa a anuncia cu e aña aki, Biblioteca Nacional Aruba ta den un colaboracion hopi special. N.V. Elmar ta celebra su 75 aniversario, y, segun señora Figaroa, cu energia pa sirbi comunidad di Aruba, ta relansa nan mascota Chispito. Den e bunita colaboracion, Chispito ta e personahe principal den e buki di e aña aki **Zap! Zap! Zzzienng!** E aventuranan di Chispito.

Señora Figaroa a expresa cu door cu esaki ta un bunita colaboracion, e aña aki a bay cu autora señora Liliana Erasmus kende a skirbi e storia di Aventuranan di Chispito y cu bunita ilustracion di señora Danielle Schothorst. **Zap! Zap! Zzzienng!** E aventuranan di Chispito ta un buki di prencipi den dos idioma, Papiamentu y Hulandes y e produccion ta di Biblioteca Nacional Aruba.

E di 33 Festival di Buki pa Mucha 2025 lo cuminsa dia 2 di November y lo ta un festival pa tur mucha na Aruba. Lo bay tin hopi evento atractivo lo bishita scolnan cu e Mascota Chispito.



Rotonde Las Americas ta un simbolo di Aruba su renobacion y reforestacion



Total a planta 176 mata riba e rotonde aki cu ta inclui e mata nan nativo manera Fofoti, Pal'i Sia Cora, Raspa Cora, y Raspa Biña, y algun otro variedad naturalisa na Aruba manera e Flamboyen y e Oleander di Boneiro.

Prome Minister Eman, encarga cu e proyecto nacional di reforestacion, kier trece matanan nativo bek den nan area natural y haci di Aruba un isla berde yena cu matanan local. Ademas e gran cantidad di mata cu kier planta tur caminda, lo cu tempo crea sombra cu na su turno tambe lo mehora e clima localmente.

Prome Minister a gradici DOW y Fantastic Garden pa nan sosten, pero tambe ATA pa nan sosten financiero. Ademas a gradici esnan cu ta traha banda di caminda cu tin e tarea pa cuida y mantene e area limpi.



ORANJESTAD (AAN): Diahuebs merdia, Prome Minister mr. Mike Eman, hunto cu Minister di Infraestructura drs. Rene Herdê y Minister di Turismo mr. Wendrick Cicilia a asisti na un ceremonia riba Rotonde Las Americas dilanti di Cas di Cultura relaciona cu e proyecto di reforestacion y di renobacion di ciudad. Despues di algun tempo cu ta renobando e rotonde aki, a toca turno pa embecece esaki cu un gran cantidad di mata.

Rotonde Las Americas ta un di e puntonan importante

riba e ruta entre aeropuerto y e area hotelero na unda gran cantidad di auto ta pasa tur dia. Den pasado e rotonde aki tabatin un fontein grandi pero cu tempo a elimina esaki pa motibo di e gastonan halto di mantenccion. Despues e rotonde a haya un facelift minimo y awo a toca turno pa renoba esaki completamente.

E renobacion ta inclui un diseño moderno y atractivo y ta inclui un variedad di mata nativo y naturalisa cu, hunto cu otro mehoracion, lo mester contribui na elevacion di nos producto Aruba.

CENTRO ESPIRITUAL JOEL DE LOS SANTOS

Nos ta cura curpa y alma. Bo tin problema di salu? Bo ta cansa di bishita dokter y bo no ta haya cura? Bo ta cansa di bishita bruho pa busca ayudo cu bo salu sin ningun progreso. Bo no tin suerte den ningun sentido? Si bo cabei ta cai hopi, bo ta haya hopi dolo di cabes, dolo di barica, subi peso sin rason, bo no ta drumi bon, bo tin problema cu bo pareha, bo ta sinti desespera sin gana di nada, depreshon. Nos ta yudabo pa bo trese bo ser keri bek, pa bo cambia bo bida pa un bida positivo. Nos no ta unico cu por yudabo pero danki na Dios nos ta e miho rond mundo yudando hende y cambiando bida. Ta bo desicion pa stop di sufri, nos ta mustrabo cu prueba ken ta e persona cu ta haci bo daño, **trabaonan 100% GARANTISA. Tratamento 100% GARANTISA.**

Yama nos na Tel: 741-7094

E tin apenas 18 aña

Hoben condena na 15 luna di prison pa intento di mata cu auto

ORANJESTAD (AAN): Diahuebs mainta e hoben masculino D.H. di 18 aña, a presenta dilanti Hues pa scucha su sentencia. E ta worde acusa cu riba 25 di Mei 2025, el a purba di mata e homber P., door di manda auto cu velocidad halto riba P., kende tabata para patras di su Scooter. Tambe D.H. ta worde acusa di tabatin arma di candela.

Den sala di Corte tabata presente e mayornan di D.H. y e homber P. Por a mira cu e homber P. ta mucho mas grandi den estatura compara cu D.H.

Intento di mata cu auto: Hues ta haya legalmente proba cu D.H., dia 25 Mei 2025 a purba di mata e homber P. Hues a bisa cu a mira e video di security cu a graba tur cos. A pasa e video aki durante tratamiento di e caso. Hues a bisa cu por a mira cu D.H. a bay cu e auto cu velocidad riba e scooter y e homber P. El a dal den e scooter y e homber P. a bula un banda.

Despues P. a coy un machete y bay riba e auto. D.H. y un ocupante a sali for di e auto. Por a mira cu e ocupante tabatin algo den su man. E momento ey, por a mira cu P. a spana y a core bay y un dama bisti na cora cu a sali pafor, tambe a spana y core bay.

Hues a mostra cu D.H. a bisa cu e tin rabia riba e homber P., y a tuma venganza door di dal e scooter di P. cu e auto. Hues a bisa cu e pregunta ta, si por papia aki di intento di mata. Pa conclui esaki mester puntra si D.H. a mira P.

Na opinion di Hues, D.H. a bisa Polis cu el a mira P. ta cana bay for di e Scooter. Sinembargo P. tabata net mey-mey di e Scooter y un muraya ora cu D.H. a manda e auto riba e Scooter. Hues a bisa

cu riba imagennan di e video di seguridad, por a mira tur cos. Esey ta muestra cu D.H. a mira P.

Culpabel di intento di mata: Hues a mostra cu ta conoci, cu si auto dal un hende, e por mat'e. Na opinion di Hues, door di core cu velocidad halto y dal contra e scooter, P. a tuma e chens cu e por a mata P.

Den e caso aki, Hues ta haya 'intento di mata' proba. Na opinion di Hues, e no ta haya proba cu D.H. tabatin un arma di candela den su man. Apesar cu P. y e dama a bisa cu a mira D.H. cu un arma. Polis sinembargo a haya huls di bala den e auto. Tabatin potretan di arma den



smartphone di D.H.

Hues ta haya cu D.H. culpabel di intento mata.

Castigo: Pa cu e castigo, Hues a bisa cu e ta tene cuenta cu D.H. tabata menor di edad ora di incidente. Esey kiermen cu mester aplica e castigo hubenil. Hues ta haya cu

D.H. mester di ayudo psicologico pa evita cu e ta haci algo similar atrobe.

Hues a mostra cu anteriormente D.H. a worde condena pa posesion di arma di candela y a haya castigo combina. D.H. a haci e delito aki den su tempo di prueba y atrobe tin arma

envolvi. Hues a bisa cu e ta agrega e 10 luna condicional di e castigo anterior, acerca di e castigo cu e ta condena D.H. El a condena D.H. na 15 luna di prison, di cual 10 luna ta condicional cu un tempo di prueba di 3 aña. E tempo di prueba. Durante e tempo di prueba, D.H. ta cay bajo guia di Reclasing. Esey ta nifica cu en total, D.H. a haya 15 luna di prison. Hues a bisa cu e demanda di daño di P. pa cu e scooter, lo worde aproba. Hues a ordena D.H. pa paga 3 mil Florin y a pone medida di pago. Hues a bisa tambe cu e auto confisca pa Polis, lo mester debilbe na e mama di D.H. y e cantidad di huls confisca lo worde destrui.

Trahando hunto cu SOGA pa yega na un solucion structural

Hospital ta informa tocante situacion di sistema di koeling na toren B

ORANJESTAD (AAN): Horacio Oduber Hospital (HOH) ta informa e comunidad di Aruba tocante e situacion actual di e sistema di koeling centralisa na Toren B, entre otro departamento di Emergencia (SEH), departamento di Maternidad y departamento di Mucha.

Actualmente ta experiancia problema tecnico cu e sistema di koeling, cu tin como consecuencia cu friamento riba prome, di dos y di tres piso ta limita. Esaki lo por causa molester pa nos pashentnan interna, pero tambe nos bishitantenan y nos coleganan cual nos ta lamenta profundamente.

Stichting Onroerend Goed Aruba (SOGA), responsabel pa e edificio y instalacionnan tecnico, ta trahando hunto cu nan contratista riba un solucion structural. Mientrastanto, HOH a in-




stala temporalmente unidadnan di airco externo den Toren B pa asina baha e temperatura y limita e molester cu e por causa pa pashent y personal di HOH.

Salud y bienestar di nos pashentnan y nos emplead-

onan ta central y aunke tin hopi reto ultimamente cu e temperaturanan haltisimo, esta hopi calor pafo, nos ta tuma tur medida necesario pa limita e efecto.

Ta pidi comprension y confianza di parti di comunidad mientras nos ta sigui traha

di cerca cu SOGA y nan contratista pa logra drecha e sistema di koeling. HOH di su banda manera semper ta compromete pa sigui brinda e servicio di calidad manera comunidad ta custumbra den un ambiente mas comodo cu ta posibel.



Awo cu 2 florin mas, bo por gana e


* Afl.

420.000,-

* Afl. 320.000,- + Afl. 100.000,-
extra

Benta ta sera 7:30 pm y sorteo ta hunga 7:45 pm

MEGA PLUS



HUNGA AWO



Sesionnan Publico tocante Informacion bou Presion na Universidad di Aruba



ORANJESTAD (AAN): Den cuadro di trece informacion na comunidad y crea dialogo riba e topico di desinformacion Red Arubiano di Prensa Profesional (RAPP) ta uni forza cu Universidad di Aruba y diferente media partners pa local ta trata diferente sesion publico di 'Informacion bou Presion'.

E sesionnan aki lo enfoca nan mes principalmente ariba e consecuencianan di desinformacion, deepfakes y noticianan falso cu ta impacta nos sociedad. E pregunta principal cu lo word trata durante e anochinan aki ta *con Aruba por construi resiliencia contra e fenomenonan aki?*

E serie di charla aki tin como meta pa aumenta alfabetisacion di medionan di comunicacion y fortalece e abilidad di e publico pa contraresta desinformacion na Aruba.

Pa medio di charlanan, discusion di panel, y ehempelnan practico, publico presente lo haya bista riba e mecanismonan tras di mal informacion y siña con pa reconoce y combati esaki. Pues den resumen, e obhetivonan di e eventonan aki ta lo siguiente:

- Aumenta comprension di desinformacion, deepfakes, y manipulacion di inteligencia artificial
- Fortalece alfabetisacion di

media bou di e publico en general

- Encurasha pensamiento critico y habilidadnan di control di echonan

- Provee un plataforma pa dialogo entre periodistanan, expertonan y ciudadanonan

E charla nan lo tuma luga ariba e siguiente dianan:

16 October: Panel tocante e impacto riba periodismo na Aruba cu periodistanan local.

Moderador: Melissa Stamper (RAPP)

Localidad: MC Chapel, University of Aruba

Orario: 7.30 - 9.00 P.M.

23 October: Stichting Deugdelijk Bestuur Aruba lo elabora ariba desinformacion y resiliencia democratico

Localidad: MC Chapel, University of Aruba

Orario: 7.30 - 9.00 P.M.

28 October: Un lectura duna pa un experto di Veiligheidsdiens Aruba (VDA) riba

AI, deepfakes, y fake news - e link di cybersecurity y desinformacion y con misinformacion ta un menasa pa estabilidad democratico.

Localidad: Aula LSB, University of Aruba

Orario: 7.30 - 9.00 P.M.

E serie di charla aki ta un colaboracion entre Universidad di Aruba, Red Arubiano di Prensa Profesional (RAPP), cu apoyo di Netwerk Mediawijdsheid y diferente (media) partners pa informa, educa y

dialoga cu comunidad y fortalece e alfabetisacion riba e tema di desinformacion.

E serie di lectura tambe lo wordo transmiti na Telearuba y via emisora di radio Hits 100 FM.

Comunidad henter ta invita pa sea atende e serie aki y dialoga cu expertonan y periodistanan riba e topico aki na Universidad of pa sigui e programa via diferente medio y red social.

Motociclista a keda herida ora di dal contra Palo di Luz



ORANJESTAD (AAN): Tabata Diaranson anochi, cu yamada a drenta na autoridad indicando cu un accident a socede riba e caminda di Sombre, y cu tin hende herida.

Esey ta suficiente pa manda patruya di Santa Cruz, y tambe pone Centro di Alarma na altura pa nan dirigi Ambulance. E informe ta cu riba e caminda di Sombre, un brommer a accidenta.

Patruya a wordo manda cu urgencia, debi cu prome yamadanan ta indica cu e motociclista ta seriamente herida.

E prome patruya di Polis cu a yega, a bin nota cu e motorcycle a dal contra un



Palo di Luz. Pero ora cu nan a yega, algun hende a bay cu e brommer caba di e lugar. E motociclista a haye eynan si.

Ambulance a yega, y Paramediconan a

hiba e motociclista den Ambulance, y despues di un triage, a opta pa bay cu ne pa Servicio di Emergencia na Hospital pa wordo atendi na forma mas avanza.

Weekly SPECIALS

10 OKT - 16 OKT '25



Each
f7.99
Normal Price

Each
f4.99
Special Price

LIMES



Per KG
f7.99
Normal Price

Per KG
f5.99
Special Price

**POTATOES IDAHO 5LBS
(BAKED POTATOES)**



Each
f7.99
STARTING FROM

**PUMPKINS
ASSORTED**



Each
f22.29
Normal Price

Each
f18.99
Special Price

**MAMBO HAM CROQUETTES
40CT**



Each
f9.59
Normal Price

Each
f8.99
Special Price

**EE 5 CHEESE TEXAS TOAST
8CT 13oz**



Each
f6.39
Normal Price

Each
f5.99
Special Price

**CHIQUITA WHOLE BLUEBERRIES
12OZ**



Per KG
f31.99
Normal Price

Per KG
f26.99
Special Price

RIB EYE BRAZIL RESERVE



Per KG
f17.99
Normal Price

Per KG
f13.99
Special Price

U.S. BONELESS PORKLOIN



Per KG
f7.49
Normal Price

Per KG
f5.49
Special Price

CHICKEN THIGHS BONE IN

*Promocion ta valido desde 10 di okt pa 16 di okt 2025 y tanten cu tin den stock.

**SUPER
Do it Center®**

Minister Geoffrey Wever:

Relato Article IV Mission di IMF ta positivo y disponibel pa pueblo



ORANJESTAD (AAN: Minister di Finansa, Asunto Economico y Sector Primario Geoffrey Wever ta informa cu e “Staff Concluding Statement of the 2025 Article IV Mission” di International Monetary Fund (“IMF”) ta disponibel riba IMF su website. Esaki ta encera e analisis di IMF riba desaroyo actual y den futuro riba tereno financiero, economico y monetario den cuadro di nan bishita den e periodo di 23 di september pa 6 di october na Aruba. Segun IMF e rebound fuerte di turismo y inversionnan den proyectonan hotelero ta factornan determinante pa e recuperacion economico. E producto interno bruto den termino real a crece cu 10.6 por ciento den 2022, sigui pa un crecimiento premira di 8.9 por ciento den 2023 y 7.6 por ciento den 2024. Inflacion a baha di 7.7 por ciento den augustus 2022 pa -0.8 por ciento den augustus 2025 como resultado di prijsnan mas abao pa cuminda y energia. E tasa di desempleo a cay na 4.3 por ciento den 2024, un reflejo di e demanda fuerte pa trabao. E balansa di pago a mehora di un deficit di 17.2 por ciento di e producto interno bruto pa un surplus di 9.3 por ciento den 2024. Reservanan internacional ta keda na un nivel saludabel cu 7.9 luna di importacion, y un sector bancario fuerte.

E recuperacion fuerte economico den combinacion cu disciplina presu-

puestario anca den ley di supervision ta factornan pa surplus di 3.0 por ciento den 2023 y 3.7 por ciento den 2024. E debe di Pais Aruba a baha di 116.3 por ciento di producto interno bruto den 2020 pa 68.6 por ciento na final di 2024. Pa 2025 y 2026 IMF ta premira cu ambos presupuesto lo cumpli cu normanan presupuestario manera anca den ley y yega na un debe di gobierno di 50.4 por ciento di producto interno bruto den 2030. IMF te recomienda entre otro pa mas eficiencia den maneho di gastonan operacional y crea fuente nan nobo di entradanan pa reduccion duradero di e nivel di debe di gobierno. IMF ta indica cu e Rijkswet di supervision financiero lo fortalece reglanan fiscal.

Pa mitiga riesgonan manera entre otro tension geopolitico, incertidumbre prolonga riba crecimiento economico pa escalacion di e “trade war”, riesgonan climatico y atraso den eheccion di inversionnan publico, IMF ta recomenda un bon coordinacion y planificacion entre departamentonan di gobierno pa proteha estabilidad macro-economico y gruponan vulnerabel. IMF ta aplaudi cu Aruba a bira miembro di e “Coalition of Finance Ministers for Climate Action”. Ademas di turismo como sector economico, IMF ta recomienda pa pusha e desaroyo di entre otro sectornan manera agricultura, economia circular, industria creativo, y transicion ener-

getico. Mehora infraestructura y clima di negoshi ta esencial pa mobiliza inversionnan di sector priva y apoya e industria turistico y diversificacion.

“International Monetary Fund ta un organizacion internacional cu ta evalua e desaroyo di nos pais continuamente y ta importante pa un y tur tin acceso na publicacion di e organizacion imporante aki. Tur interesa por bishita e website di IMF pa e relato “Staff Concluding Statement of the 2025 Article IV Mission”, segun Minister di Finansa, Asunto Economico y Sector Primario Geoffrey Wever.



THE CASINO AT
ST REGIS
ARUBA



Exquisite Bingo

Every Saturday and Sunday at 8:30 AM. Casino doors open at 7:30 AM.
Buy-in: \$20. Buy 2 bingo cards, get the 3rd free.

Pre-sale: Every Friday and Saturday from 5:30 PM - 8:00 PM.

\$5,000 in total prizes

Door prizes: \$100 Slot Credit | Voucher at Grano Café | Dinner for two at Eskama Cucina Italiana.

Progressive Jackpot starting at
\$25,000

Limited capacity available.
Rules and Regulation apply. Visit the Casino VIP Desk for more information.

Must be over the age of 18 years. The Casino at St. Regis Aruba encourages Responsible Gaming.

99¢

RENTS

APPLIANCES



COMPUTERS & LAPTOPS



LIVING ROOM DINING ROOM



SPEAKERS



SMARTPHONES



Many Sizes In Stock



GAME SYSTEMS



BEDROOM SETS & MATTRESSES



*Your First Rental Payment

*This is a rent to own transaction. 99 cents pays for your first rental payment. Regular rental rates apply thereafter. You don't own the product until all rental payments are completed. Example: 17.95af1 x 12 months=933.40af1. Items may be different from pictured. Some restrictions apply. See store for details.

NO CREDIT CHECKS

DIALRTO.COM

CUMANA 74 | 582-RENT

DiL
RENT TO OWN & RETAIL

Haydelyn Thijsen, Executive Office di BCA:

Durante evento 'Conoce ^{BO} Banco Central' lo enfoca riba cuater seccion hopi rico den informacion interactivo y participativo

• Grandi y chikito lo siña hopi tocante BCA

ORANJESTAD (AAN)

Señora Haydelyn Thijsen, Executive Office di BCA, tambe a hiba palabra den e conferencia di prensa, convoca Diaranson, tocante nan evento di dia 22 di November venidero. E dama a cumenza bisando cu pa proyecta e trayectoria di 'rebrand' y e compromiso di ta mas cerca di comunidad, nan ta organiza 'Conoce ^{BO} Banco Central', cu enfoca riba nan diferente seccion, y na unda grandi y chikito lo ser conoci cu nan trabao y trayectoria. E evento lo tuma lugar di 10'or di mainta te 6'or di atardi.

"Durante e dia nos lo mustra e diferente sec-



cionnan di nos trabao, den e rol di mantene estabilidad financiero riba nos Isla, conscientizacion riba Cyber Security, y tambe educacion financiero. Publico lo por siña mas di Banco Cen-

tral den su rol, e balor di nos florin, sigura estabilidad financiero y oportunidad tambe pa cumenza un carera aki, na Banco Central. Nos lo tin cuater seccion den cual nos ta bay ta rico den infor-

macion y tambe ta bay ta sesionnan interactivo y participativo", señora Thijsen a splica.

Señora Thijsen a agrega cu esaki ta nifica cu e publico ta bay tin acceso na e comunicacion, participacion, y informacion di cada seccion.

El a splica cu tin cuater seccion: E promete "Banco Central di Aruba: antes, awe y den futuro", e di dos: "Nos Tesoro, Aruba su Florin". E di tres: "Cyber Operations", y e di cuater: "Bo Finanzas den Bo man".

"E promete seccion lo refleha Banco Central su tareanan principal, historia, direccion strategico y tambe 'Con pa traha na Banco Central di Ar-

uba'. Esaki ta sigui pa un exposicion unda cu lo mustra placa di papel, monedanan di pasado, di awo y di futuro, cual ta e di dos seccion Nos Tesoro. Den e di tres seccion, Banco Central ta habri su portanan pa Cyber Operations", señora Thijsen a relata. Esaki ta un actividad interactivo unda cu lo concientiza comunidad tocante "Cyber Security".

"Como ultimo seccion, lo tin tayernan financiero pa tanto grandi como chikito, con pa maneha budget, con pa spaar, tambe lo tin weganan di puzzle pa mucha, tocante maneho financiero", señora Haydelyn Thijsen a bisa, finalmente.

SETAR

DIGITAL WEEK

FREE Entrance
Registration Required

October
20 to 24

SETAR Conexion Center
Seroe Blanco 29a

9:00 am - **4:30** pm

Come and Learn about:

Future Thinking, ChatGPT, CapCut,
Social Media, Canva, Digital Budgeting,
Cybersecurity, and more.



More information visit us at
www.setar.aw/digitalweek



Actividad 'Conoce ^{BO} Banco Central'

Banco Central di Aruba ta invita comunidad di Aruba pa un experiencia unico y educativo



ORANJESTAD (AAN): Pa prome biaha den su historia, Banco Central di Aruba (BCA) ta habri su porta pa comunidad pa un evento historico: 'Conoce ^{BO} Banco Central'. DIARIO a compronde cu e actividad lo tuma lugar riba Diasabra 22 di November 2025, y lo brinda un experiencia educativo y interactivo unda grandi y chikito por descubri e rol esencial cu Banco Central tin den nos economia y comunidad.

Durante un conferencia di prensa, Division Manager Payment System, Treasury & Banking Operations, Señora

Penelope Tromp-Gomez a hiba palabra splicando BCA su compromiso continuo den informa comunidad. "Pa prome biaha BCA ta habri su porta pa pueblo di Aruba pa asina ofrece e oportunidad di conoce mihor nos mision, bator y nos rol como Banco Central". Señora Tromp-Gomez ta elabora cu den cuadro di e trayectoria di actualisacion di Banco Central su identidad visual, BCA no solamente ta refleha un imagen visual nobo, pero tambe re-enfora su compromiso pa ta mas cerca di e comunidad, y di e forma aki fortifica



conocimiento di e rol esencial cu Banco Central tin como organo.

Durante e actividad lo ofrece un oportunidad unico pa grandi y chikito explora e diferente area di trabao di BCA. Señora Haydelyn Thijsen, Manager Executive Office, a splica cu durante e dia, lo tin 4 seccionnan di informacion unda bishitante nan lo por siña mas di BCA. E seccionnan ta consisti di: BCA – Antes, awo y den Futuro, Nos Tesoro – Aruba su Florin, Cyber Operations, y Placa Sabi – Bo Finanzas den Bo Man. Cu e prome seccion lo muestra e tareanan principal di BCA, su historia, direccion strategico y con e ta pa traha na Banco Central di Aruba; e siguiente ta un

exposicion di placa di papel y monedanan di antes y di awo; e di tres ta dedica na "Cyber Operations" cu actividadnan interactivo pa crea concientisacion riba cyber security; y por ultimo BCA lo tin tayernan financiero interactivo pa grandi y chikito riba topico di budget y spaar. Señora Thijsen ta splica cu lo bay tin diferente sessionnan interactivo y participativo cu ta complimenta e experiencia na uno rico na conocimiento. Pa esnan di mas chikito lo tin wega y puzzel educativo cu lo haci e topico di maneha finanzas accesibel pa un y tur.

Señora Elmelynn Croes, Senior Economist, ta añadi aspectonan di logistica di e evento, unda cu lo tin parkeo amplio den vecindario. Kiwanis Palm Beach lo ta encarga cu un cantina bon surti. Señora Croes ta splica cu pa cu e evento aki lo ta colaborando cu Korps Politie Aruba su K9 unit, Brandweer y Ambulans cu lo duna tur bishitante e oportunidad pa conoce mas di nan trabao.

Finalmente, Señora Tromp-Gomez, ta enfatisa cu e actividad ta un oportunidad pa comunidad conoce no solamente e trabao di Banco Central pero conoce tambe e team dinamico tras di un institucion asina importante pa Aruba: "Un gradicimento special ta bay na e team di BCA cu ta dedica na haci e evento aki, uno exitoso", Señora Tromp-Gomez ta finalisa.

Banco Central di Aruba ta haci un invitacion cordial na comunidad completo pa bishita 'Conoce ^{BO} Banco Central' y tuma parti den e experiencia educativo y interactivo riba 22 di November.

'Conoce ^{BO} Banco Central' ta cuminsa for di 10:00 a.m. y lo ta te cu 6:00 p.m. BCA ta sigura cu e evento lo ta un dia yena di conocimiento, descubrimiento y inspiracion. Sin duda un muestra di BCA su compromiso pa integridad, sostenibilidad y responsabilidad pa comunidad di Aruba.

Parlamentario Eduard Pieters di PPA:

'Mocion di Raoul White di Tweede Kamer ta oportunidad real pa logra brain gain pa Aruba'

ORANJESTAD (AAN): Fraccion di PPA constantemente ta percura pa keda na altura di e desaroyonan cu ta tumando lugar na Hulanda y ta sigui esaki di cerca. Ta un gran placer pa mira cu den Tweede Kamer mes, representante di e partidonan GroenLinks y Partij van de Arbeid, cu ta considera como "zuspartij", di PPA, miem-

bro di Twee Kamer, sr. Raoul White a presenta un mocion, cu por habri un futuro diferente pa nos hobennan. E mocion ta pidi pa gobierno Hulandes explora posibilidad pa un periodo di Gracia of un areglo special pa pago di e debe di e studiantenan di e islanan; Aruba, Bonaire, Curaçao, St. Maarten, Saba y St. Eustatius.

"E motibo di e iniciativa ta cla: Yuda nos hobennan pa por instala back na nan pais, despues di un estudio superior cu exito na Hulanda. Di e forma aki ta crea un berdadero brain gain pa nos comunidad".

Partido di PPA ta duna su apoyo firme na e mocion aki, pasobra esaki tabata un di e metanan den nan programa

Nos Aruba 2050, cu e partido a core campaña cu ne aña pasa. Parlamentario Eduard Pieters a cita textualmente: "Lo introduci un periodo di gracia di maximo 5 aña, ora di paga back studielening pa esnan cu termina exitosamente un estudio riba nivel di enseñansa superior."

Pakico un periodo di Gracia ta asina importante: Den



Minister of Finance, Economic Affairs
and the Primary Sector
mr. Geoffrey Wever

VACATURE LID RAAD VAN COMMISSARISSEN ARUBA AGRI DEVELOPMENT COMPANY N.V.

De Aruba Agriculture Development Company N.V. is een vennootschap waarvan alle aandelen in handen zijn van het Land Aruba en sinds maart 2024 actief met als missie het stimuleren van duurzame en innovatieve landbouw op Aruba. Wij zetten ons in voor het versterken van agrarisch ondernemerschap en het creëren van kansen voor lokale en internationale investeerders in de landbouwsector.

Onze activiteiten richten zich onder andere op:

- Het ondersteunen van een financiële instelling bij het exploiteren van een Agrifund ter ondersteuning van agrarische ondernemers;
- Het bevorderen van ondernemerschap binnen de agrarische sector;
- En het ontwikkelen van een Agri Innovation Park: een broedplaats voor innovatie, samenwerking en kennisdeling in de landbouw.

Met deze initiatieven willen wij bijdragen aan een veerkrachtige, toekomstgerichte landbouwsector die economische groei en voedselzekerheid op Aruba stimuleert.

Functie

Wij zoeken een deskundig en betrokken lid voor onze Raad van Commissarissen. U houdt toezicht op het beleid van het bestuur en de algemene gang van zaken binnen de vennootschap. Tevens adviseert de RvC het bestuur.

Profiel kandidaat:

- ▶ Minimaal een afgeronde HBO/WO opleiding en ruim/tenminste 7 jaren ervaring op senior management of directieniveau.
- ▶ Kennis en ervaring met strategische en bestuurlijke besluitvormingsprocessen volgens de principes van Good Governance.
- ▶ Bewezen inzicht in financiële en bedrijfsadministratieve principes.
- ▶ Ervaring met (internationale) fondsenwerving is een pre.
- ▶ Integer, daadkrachtig, resultaatgericht en stressbestendig.
- ▶ Sterke mate van sociaal-maatschappelijke sensitiviteit en betrokkenheid. Affiniteit met de agrarische sector is een pre.
- ▶ Professionele beheersing van de Nederlandse, Engelse taal in woord en geschrift.

Indien u interesse heeft in deze functie kunt u uw motivatiebrief met bijbehorend curriculum vitae vóór 1 november 2025 e-mailen naar info.minfeps@arubagovernment.aw.

Nadere informatie en een uitgebreide functieomschrijving kunt u opvragen via deze e-mail.



e periodo di Gracia, e hoben por instala sin presion financiero, haya un hipoteca y cumpra un cas back na Aruba, keda cu mas cash pa move den bida, cumpra un auto y establece su mes na Aruba. Di e forma aki e hobennan ta haya e accion aki atractivo y lo kier bin back Aruba pa traha y contribui cu desaroyo di nan pais.

Loke PPA tambe a incorpora den nan Programa 2050 tabata e parti cu lo negosha cu gobierno Hulandes pa tambe inclui esnan cu ta haya un studiefinanciering, pa asina den e periodo di gracia aki, no lo tin interes riba nan debe.

PPA trahando mas di cerca awor cu Hulanda: E solo echo cu awe por mira back, cu un parlamentario Hulandes ta presenta un mocion, cu ta aline cu e programa di PPA, ta muestra cu PPA ta riba e bon caminda. Parlamentario Eduard Pieters a enfatisa: "Esaki ta un oportunidad pa nos pueblo, pa nos hobennan y pa Aruba. Si Hulanda ta reconece esaki y ta duna nos un man, nos lo por crea un Aruba cu mas profesional, mas speranza y mas futuro. PPA ta sigui lucha pa esaki."

Finalmente Parlamentario Pieters a indica cu: "Nos ta spera cu gobierno di Hulanda duna luz berde na e mocion aki, cu lo bira conoci dia 1 di maart proximo. Pa nos, esaki no ta solamente un mocion, pero un posibilidad real pa cambia e rumbo di nos isla y pa motiva nos hobennan: bin back, keda, y traha pa un Aruba cu bo mes por yama bo cas di berdad.

Gobierno ta sigui traha pa revitalisa centro urbano:

Bishita conhunto di MinInfra y MinFEPS na Oranjestad



ORANJESTAD (AAN): Den cuadro di e “Programa di Gobernacion AVP-FUTURO 2025-2028”, cu tin como un di su prioridad stimula activamente e renobacion di San Nicolas y Oranjestad cu inversion y oportunidad pa tur hende, Minister di Finansa, Asunto Economico y Sector Primario mr. Geoffrey Wever hunto cu minister di Infraestructura, drs. Rene Herd  a haci un bishita conhunto na centro di Oranjestad.

Durante e bishita, Minister Wever y Minister Herd  a reuni cu Elton Arends di 360 Innovation y Harry Koeman

di Oranjestad Investment Group, pa ha a un bista amplio di e diferente proyectonan y inversionnan cu ta wordo desaroya den e centro urbano.

E obhetivo principal tabata pa duna e ministernan un vision integral di e proceso di revitalisacion urbano, tanto na nivel di infraestructura como na nivel di actividad economico y social.

Minister Wever a splica cu di banda di gobierno tin hopi proyectonan cu actualmentata canando, y tin hopi mas den pipeline. “Nos ta compromete pa revitalisa nos ciudad-



nan, duna nan un cara nobo, stimula actividad economico y crea oportunidad pa tur hende. E proceso di renobacion di edificio y cayanana ta un pida esencial pa eleva nos coiuadnan na un nivel mas halto di desaroyo,” segun e minister.

E encuentro a confirma un mensahe importante: Gobierno di Aruba ta determina pa desaroya Oranjestad y San Nicolas, como centro nan di actividad, bida urbano y oportunidad pa inversion. “Revitalisa nos ciudadnan no ta solamente un cuestion di infraestructura, sino un inversion den nos identidad, nos futuro y e bienestar di tur ciudadano di Aruba,” Minister Wever a conclui.




Buki nobo di Liliana Braamskamp-Erasmus titula ‘Zap! Zap! Zzziennnng!’



ORANJESTAD (AAN): Biblioteca Nacional Aruba ta presenta otro edicion di su Festival di Buki pa Mucha. Un festival pa tur mucha na Aruba. Un Aprojecto cu ta consisti di hopi evento, bishita pa scol y e produccion di un buki special.

Autor di buki pa mucha, Liliana Braamskamp-Erasmus, ta trece otro aventura pa mucha, hunto cu su colega ilustrador Danielle Schothorst. Titulo di e buki ta ‘Zap! Zap! Zzziennnng!’.



Un buki unico, yen di aventura, dibertido y colorido den tur sentido, cu Chispito como personahe principal. Escritora di buki pa mucha, Liliana Braamskamp-Erasmus, un bes mas, ta contribui grandemente na un festival di buki aventuroso cu Zap! Zap! Zzziennnng!’.

Biblioteca Nacional Aruba ta presenta e buki aki cu orguyo y alegria. Tur scol participante ta haya e buki regalo pa nan biblioteca.

Tur cliente di libreria ta haya e buki aki gratis cu compra di 25 Florin, tanten cu tin. Por

haya e buki gratuitamente na tur libreria ora compra un buki pa mucha, tanten cu tin.

Liliana Braamskamp-Erasmus a nace cu un pasion pa skirbi. Na scol basico caba el a cuminsa skirbi storia y na 2003 Liliana a publica su prome buki ‘Rima Rond di Aruba’. E ultimo dos publicacion di e autor aki ta ‘Aza y e portanan magico’ y ‘Zap! Zap! Zzziennnng!’.



AANKONDIGING A.R.nr.AUA202502984AR

Bij exploit van 9 oktober 2025 van de deurwaarder voor burgerlijke zaken bij het Gemeenschappelijk Hof van Justitie van Aruba, Curacao, Sint Maarten en van Bonaire, Sint Eustatius en Saba, en bij het Gerecht in Eerste Aanleg van Aruba, waarvan een afschrift is gelaten aan de Directeur van de DWJZ op Aruba, die het origineel voor GEZIEN heeft getekend, is: **ELIZABETH MWIHAKI KUIRA**, wonende in Nederland, zonder bekende verblijfplaats, **OPGEROEPEN** om op **WOENSDAG, 28 JANUARI 2026 des voormiddags om 08:30 uur** te verschijnen bij het Gerecht in Eerste Aanleg van Aruba, J.G. Emanstraat 51, Aruba. Zij dient uiterlijk die dag v  r 09:00 uur, persoonlijk of via een gemachtigde, te reageren op het verzoekschrift van **John Fitzgerald Bromet**, wonende te Aruba aan de Diamantbergweg 70. Een schriftelijke reactie kan in tweevoud worden ingediend bij de balie van het Gerecht of per e-mail via: woensdaghandelsrolaua@caribjustitia.org, met vermelding van zaaknummer en zittingsdatum in het onderwerp.

De deurwaarder B.R. Roos,



AANKONDIGING • A.R.nr.AUA202503039AR

Bij exploit van 9 oktober 2025 van de deurwaarder voor burgerlijke zaken bij het Gemeenschappelijk Hof van Justitie van Aruba, Curacao, Sint Maarten en van Bonaire, Sint Eustatius en Saba, en bij het Gerecht in Eerste Aanleg van Aruba, waarvan een afschrift is gelaten aan de Directeur van de DWJZ op Aruba, die het origineel voor GEZIEN heeft getekend, is: **CHRISTOPHER JOEL ANTHONY CROES**, wonende te Aruba, thans zonder een bekende woon en/of verblijfplaats, **OPGEROEPEN** om op **WOENSDAG, 28 JANUARI 2026 des voormiddags om 08:30 uur** te verschijnen bij het Gerecht in Eerste Aanleg van Aruba, J.G. Emanstraat 51, Aruba. Hij dient uiterlijk die dag v  r 09:00 uur, persoonlijk of via een gemachtigde, te reageren op het verzoekschrift van **Frank Alexander Kelly**, wonende te Aruba aan de Figarostraat 16. Een schriftelijke reactie kan in tweevoud worden ingediend bij de balie van het Gerecht of per e-mail via: woensdaghandelsrolaua@caribjustitia.org, met vermelding van zaaknummer en zittingsdatum in het onderwerp.

De deurwaarder B.R. Roos,



AANKONDIGING A.R.nr.AUA202503284AR

Bij exploit van 9 oktober 2025 van de deurwaarder voor burgerlijke zaken bij het Gemeenschappelijk Hof van Justitie van Aruba, Curacao, Sint Maarten en van Bonaire, Sint Eustatius en Saba, en bij het Gerecht in Eerste Aanleg van Aruba, waarvan een afschrift is gelaten aan de Directeur van de DWJZ op Aruba, die het origineel voor GEZIEN heeft getekend, is: **AHMADU SINT JAGO** wonende te Aruba, thans zonder een bekende woon en/of verblijfplaats, **OPGEROEPEN** om op **WOENSDAG, 17 DECEMBER 2025 des voormiddags om 08:30 uur** te verschijnen bij het Gerecht in Eerste Aanleg van Aruba, J.G. Emanstraat 51, Aruba. Hij dient uiterlijk die dag v  r 09:00 uur, persoonlijk of via een gemachtigde, te reageren op het verzoekschrift van **Practice For Advanced Dentistry N.V.**, gevestigd te Aruba, domicilie kiezende ten kantore van de advocaat mr. R.A.M. van de Velde (Wix Attorneys at law). Een schriftelijke reactie kan in tweevoud worden ingediend bij de balie van het Gerecht of per e-mail: woensdaghandelsrolaua@caribjustitia.org, met vermelding van zaaknummer en zittingsdatum in het onderwerp.

De deurwaarder B.R. Roos,

IMF ta confirma direccion di gobierno:

Politica enfoca riba crecimiento husto y fortificacion di poder di compra ta duna resultado



ORANJESTAD (AAN): Cu gran satisfaccion, riba Diahuebs Gobierno di Aruba ta ricibi e resultado positivo di Fondo Monetario Internacional (IMF) den su Staff Concluding Statement di e

2025 Article IV Mission pa Reino Hulandes y Aruba.

IMF ta aprecia e prestacion economico di Aruba, finansa publico saludable, y principalmente e politica cu ta enfoca riba

bienestar, prosperidad comparti y fortificacion di e poder di compra di e pueblo.

“Cu gran satisfaccion por mira cu un institucion manera IMF ta reconoce explicitamente

cu e politica di Gabinete AVP-Futuro ta basa riba distribucion husto di ingreso y inversionnan cu ta mehora e bida diario di nos pueblo,” segun Prome Minister Mike Eman. “Nos ta sigui construi un economia cu no solamente ta crece, pero cu ta crece pa tur hende.”

Diversificacion y balor comparti: IMF ta indica cu Aruba ta traha cu exito riba e desaroyo continuo di un modelo di turismo High-Value, Low-Impact (HVLI) cu ta genera “balor halto comparti pa e pueblo” y ta fortifica e producto Aruba.

Ademas, IMF ta expresa su apoyo pa e iniciativa di “Promising Sectors” (manera agricultura, economia circular, industria creativo, economia di conocimiento y energia renobabel) cu ta ofrece un caminda sostenibel pa diversificacion economico.

“Nos direccion ta cla,” segun Premier Eman. “Nos kier pa e prosperidad cu ta genera cu turismo y di e sectornan nobo, keda comparti ampliamente. Esey ta e esencia di e bon comun cu nos ta persigui.”

Politica fiscal responsabel cu husticia social IMF ta receptivo pa e prome paso di Gobierno pa un presupuesto orienta riba meta di maneho, den cual e gastonan publico ta alinea cu e prioridadnan dirigi riba bienestar, prosperidad y poder di compra. IMF ta menciona explicitamente e aumento di pensioen, e ampliacion di cobertura di medicina, y e sosten pa famianan cu ta ricibi asistencia social como resultado positivo di e maneho aki.

“E hecho cu e IMF ta reconoce cu nos ta inverti den nos pueblo (den nos grandinan, famia y cuida di salud) ta muestra cu Aruba no ta scohe pa un contabilidad sin sentido y sin vision, sino pa un maneho cu ta inclui tur hende, pa e bon comun,” Prome Minister a declara.

Inversion den futuro- e fondo di inversion: IMF ta mira lesnan positivo cu por saca for di proyectonan bao di e Fondo di Desaroyo Aruba (FDA), cu por sirbi como ehempel pa e creacion di e futuro fondo di inversion.

IMF ta enfatisa riba e importancia di un estructura cla, bon gobernacion y coordinacion pa uza fondonan publico di manera eficiente y pa alinea e prioridadnan nacional.

“E fondo di inversion lo ta un instrumento pa sigui construi structuralmente riba nos futuro,” Eman a bisa. “IMF ta subraya precisamente loke nos ta defende: inversion cu vision, responsabilidad y resultado — pa e bon comun di Aruba.”

Aruba riba bon caminda: Cu e evaluacion positivo aki, IMF ta confirma cu e maneho di Aruba ta bay den e direccion corecto: (*) Un fuerte crecimiento economico. (*) Desempleo den reduccion. (*) Finansa publico saludable. Y tur esaki ta conecta cu un maneho enfoca riba bienestar creciendo di e pueblo.

“Aruba ta demostra cu recuperacion economico y husticia social por bay man den man,” Prome Minister Eman a conclui. “Nos ta sigui traha pa un futuro den cual tur hende ta progresa, pasobra Aruba ta di nos tur.”

SGT PEPPER'S FLEA MARKET

JOIN US FOR A HALLOWEEN FLEA MARKET INCLUDING A SUPPLY DRIVE, FOUNDATIONS, AND A RAFFLE. SECOND-HAND AND HANDMADE ITEMS ONLY!



DON'T MISS THE FOUNDATION SNOOP DOGGY KIDS' CORNER WITH SPOOKY CRAFTS, FACE PAINTING, A FUN PHOTO OPP WITH SPECIAL GUESTS AND A TREASURE CHEST.

OCTOBER 18TH
9AM-12:30PM
AT TANKI LEENDERT 132B

CONTACT US TO SELL:



@sgtpeppersfriends
Sgt Pepper's Friends
info@sgtpeppersfriends.com



Joswald Peterson ta empleado superior di Aruba Bank



ORANJESTAD (AAN): Joswald Peterson ta empleado superior di Aruba Bank pa luna di augustus 2025. Un empleado cu a demostra dedicacion y iniciativa, logrando asina e reconocimiento aki.

E compromiso di Joswald pa semper brinda un experiencia superior na cliente interno di Aruba Bank ta refleha e balornan principal di e banco. Su dedicacion y manera proactivo di traha ta crea un impacto positivo.

Den su tempo liber, Joswald su pasion ta 3D printing, un hobby creativo cu ta duna inspiracion y posibilidad pa explora y crea obheto innovativo.

Pabien, Joswald, pa ta un empleado cu ta representa e bon cultura di servicio di Aruba Bank.

Accident basta considerabel na T-weg di Pos Abao



ORANJESTAD (AAN): Tabata algo prome cu 12'or di merdia, cu Central di Polis a dirigi patruya di Polis na e T-weg di Pos Abao y Hato, pa un accident.

E unidad di Polis cu a yega eynan, a bin haya e accident net dilanti cas Hato 15, na altura di e T-weg aki. E choque tabata entre un auto deportivo y un vehiculo Van. Polis a nota cu e chauffeur di e Hyundai H1 Van ta herida, y pesey a pidi Ambulance.

E accident a socede ora cu e H1 Van ta bin for di Bubali yegando e T-weg, y a subi caminda sin duna preferencia na un Nissan Fairlady Z color blanco cu tabata bayendo pabao.

E chauffeur di e Nissan no por a evita un choke, y a dal fuertemente den e banda robez di e Hyundai, y a pone esaki draai bek casi cara panort bek.

Ambulance a yega, y a atende e chauffeur di e Hyundai. E daño material ta considerabel.

Analisis - Parti 3

2025: Un analisis di 'Rijkswet' pa Aruba

Skirbi pa: Jorge A. (Chando) Pietersz

(Continuacion di edicion anterior)

Sinembargo ta di suma importancia p'e pueblo di Aruba ta conciente kico verdaderamente ta pasando cu nos autonomia, igualmente Status Aparte. Cu e logro di Status Aparta, Aruba a bira un pais autonomo den Reino Hulandes. Autonomia di pais Aruba entre otro ta resalta constitucionalmente den un propio organo legislativo considera e organo mas halto di e pais. Parti di e tarea parlamentario ta cu mester controla e organo ehecutivo (Conseho di Ministro) y stipula e leynan domestico y den seno di Reino e convenionan internacional cu ta 'toca' Aruba. E instrumento mas valioso cu Parlamento tin pa por controla e maneho di gobierno ta e derecho di presupuesto (begrotingsrecht). Y ta facil pa comprende pasobra e maneho di Gobierno ta refleha su mes den cifranan cu ta para den e presupuesto di e pais. Kico pueblo di Aruba por spera awor di Parlamento di Aruba relacion cu introduccion di e afamada HOFA cu den lineanan grandi lo interveni den e proceso pa stipula y despues pa cu ehecurion di e derecho di presupuesto di Aruba: cu otro palabra e maneho financiero di Gobierno?

Den poco ocasion o casi nunca ta papia di e di tres tarea cu Staten tin pa por sali na defensa di pueblo. Den mi publicacion, 'Burgers en Bestuur' por lesa: *"Een derde taak van de Staten is het opkomen voor de belangen van Aruba bij de regering van het Koninkrijk en/of bij de Staten-Generaal, [...] Dit gebeurt door gebruik te maken van zijn bevoegdheid. Ook kan de Staten zich baseren op het petitierecht"* (Jorge A. Pietersz, 'Burgers en Bestuur' p. 174).

E derecho di Parlamento pa por entrega por escrito un peticion na instancianan gubernamental di un nivel mas halto ta real. Texto di Constitucion ta bisa: *"De Staten zijn bevoegd de belangen van Aruba voor te staan bij de regering van het Koninkrijk en bij de Staten-Generaal"* (Ab. 1985 no. 26). Haciendo uso di e derecho aki Parlamento, irespecto loke Gobierno dicide, por acerca Consejo di Ministro di Reino, Eerste- y Tweede Kamer cu un peticion. Esaki no a socede!!

Aki bao mi lo mustra a base di e carta pa Tweede Kamer (d.d. 23 april 2024) cu Gobierno di Aruba lo *notifica* Parlamento di Aruba di un cu otro tocante di e convenio cu Hulanda y Aruba a sera y tambe di e proceso pa yega na e Consensusrijkswet. Linguistanan lo no tin problema cu interpretacion di e palabra *notifica* pero den e contexto aki e por trece discusionnan huridico constitucional cu ne. Kico berdaderamente ta encera *notifica* y despues di a worde informa ki pasonan Parlamento di Aruba lo por o mester a tuma si no ta para tras di e acuerdo cu Gobierno di Aruba a conveni cu Hulanda.

Pero e materia ey, riba su mes interesante na e momentonan aki no ta relevante. Relevante ta keda, e rol di Parlamento di Aruba na momento cerca di introduci HOFA. Mester constata cu Consejo di Ministro di Aruba na momento cu a yega na un areglo cu Hulanda cu mester desemboca den un Consensusrijkswet, a pasa e Parlamento di Aruba tres fastball linea recta: ayo Parlamento bay sinta den dug-out y sigui wak e weg cu Hulanda ta hunga cu nos autonomia. Esey por bisa cu cierto sarcasmo, pero no menos berdad y doloroso.

Prof. J. A. Borman den su investigacion rond di introduccion di un Consensusrijkswet en general y su relacion cu e organo legislativo di un pais autonomo (Parlamento di Aruba den e caso aki) a duna su interpretacion y ta bisa textualmente: *"Onderlinge regelingen zijn niet aan parlementaire goedkeuring onderworpen"* (Mentko Nap, Wetgeving van het Koninkrijk der Nederlanden, 2003, p. 102).

Cu otro palabra, den practica no ta necesario cu na vispera di introduccion di e Consensusrijkswet, Parlamento di Aruba mester/por duna su aprobacion na e areglo cera entre Gobierno di Aruba y Hulanda. Consecuentemente e organo aki tampoco ta envolvi directamente den e proceso pa acepta o no e Consensusrijkswet cu lo sucede por medio di Eerste- y Tweede Kamer. Pa refresca nos memoria e carta na Tweede Kamer ya menciona ta indica cu for di April 2024 Parlamento di Aruba supuestamente mester ta na altura di e areglo entre Gobierno di Aruba y Hulanda.

Bao di e circunstancianan aki mas leu cu Parlamento di Aruba por yega ta manda un 'Verslag' pa Tweede Kamer. Ta bon pa remarca cu Statuto ta explicito ora ta trata di e rol di paisnan autonomo na otro banda di oceano ora ta trata di introduccion di un Rijkswet cu caracter mandatorio cu directamente ta toca e isla(nan). Pero menos o asta pover ora ta trata di introduccion di un Rijkswet a base di consensus. Loke ta comprendibel tambe debi na e echo cu realizacion di un Consensusrijkswet ta basa riba un convenio. Partidonan envolvi mester ta debidamente na altura di e proceso y contenido relaciona cu e areglo.


Nos por conclui e ora ey cu resultado di convenionan entre dos o mas pais den Reino no directamente ta competencia di Parlamento di Aruba como e representantenan directo di e pueblo. E realidad (cruel) ta cu Gobiernonan di turno den contexto di e analisis aki for di 2015 pa awo a contribui di un forma of otro na mitiga e autonomia di Aruba. Awor nos futuro, bienestar y felicidad ta den man di 150 Hulandes europeo cu poco vinculo y conocimiento di nos necesidadnan.

Parti 4 ta bay sigui den siguiente edicion

Banco Central reportando

Indice di Percepcion di Negoshi a subi durante e segundo trimestre di 2025

Grafico 3: Expectativa di crecimiento economico den e siguiente 12 luna.



ORANJESTAD (AAN): Banco Central di Aruba (BCA) a conclui e encuesta di percepcion di negoshi pa e segundo trimestre di 2025. E encuesta di percepcion di negoshi ta evalua e percepcion economico di e negoshinan local.

E asina yama ‘Business Perception Index, cu ta consisti di e indicenan di condicion economico a corto plaso y condicion economico actual, a crece for di 102,0 den e promer trimestre di 2025 te

na 105,4 den e segundo trimestre di 2025 (mira Grafico 1).

E indice di condicion economico a corto plaso a subi cu 8,0 punto di indice te na 106,1, mientras cu e indice di condicion economico actual a baha cu 0,2 punto di indice te na 104,9 den e segundo trimestre di 2025 (mira Grafico 2).

E expectativa pa locual ta crecimiento economico, mitar di negoshi encuesta ta antici-

pa un crecimiento economico positivo den e siguiente 12 lunanan (mira Grafico 3).

Durante e segundo trimestre di 2025, e porcentahe di negoshi encuesta indicando “ningun cambio” den empleo a baha cu 5,0 punto di porcentahe te na 47,1%. E porcentahe di negoshi encuesta cu a raporta un “ganashi” a subi cu 0,3 punto di porcentahe te na 94,1% den e segundo trimestre di 2025.

E relato completo di e encuesta di percepcion di negoshi ta disponibel ariba website di BCA na cbaruba.org

E porcentahe di negoshi encuesta indicando “mehoracion” den e condicion economico actual di inversion a crece cu 11,7 punto di porcentahe te na 47,1% den e segundo trimestre di 2025. Encuanto condicion eco-

Grafico 1: ‘Business Perception Index’.





Grafico 2: Resultado di Condicion Economico actual y Condicion Economico a corto plaso durante e segundo trimestre di 2025.



nomico a largo plaso pa e siguiente 12 lunanan, 35,3% ta anticipa cu e tasa di inflacion lo ta entre 2% y 3%.

Cindy Peña, coordinador evento na IBiSA: Ainda tin cupo pa “Youth Adventure Camp” di IBiSA, pero masha tiki mes!

**Dialuna ta cuminsa, asina cu mester pura pa inscribi y paga*

ORANJESTAD (AAN)—Candy Peña, Coordinadora di Evento di IBiSA, den entrevista cu Matutino DIARIO a informa cu tin algun lugar mas pa nan “Youth Adventure Camp”. IBiSA ta casi cla cu e preparacion y tur lugar cu nan tin den e programa, a confirma nan participacion y e muchanan ta inscribiendo caba.

E parti logistic y tur otro aspecto mester ta cla pa otro siman, Dialuna.

Candy a reitera cu tin tiki lugar disponible so, asina cu mester pura yega na IBiSA entre 8’or di mainta pa 12’or di merdia, y di 1’or pa 4’or di atardi pa haci e pago y inscribi e mucha.



Peña no a duna mucho detaye tocante e programa di actividadnan pasobra nan intencion ta pa e muchanan yega experimenta, no obstante el a bisa cu ta bay tin Hiking, lo bay Mariniers Kazerne, y na Palm Island, y un par di sorpresa mas cu nan tin.

E camp ta bay mas tanto pa e parti di aventura, y lo tin actividad dentro di cada actividad, segun Candy Peña a menciona.

E campamento ta cuminsa Dialuna 13 te cu Diabierna 17 di October awo. Cada dia lo tin actividadnan nobo y diferente.

Muchanan mester ta na Linear Park, Plaza Turismo, mainta entre 7.30’or cu 8’or. Y di aki nan ta sali bay tur e camindanan destina. Eynan e mayornan ta trece e muchanan y ta busca nan tambe. Tin un excepcion Diamars, pero IBiSA ta informa e mayornan na unda nan busca nan yiunan.

Tur e detayenan di campamento mayornan ta haya via email, ora di baha, ora di busca, etc. Den e tempo aki cu tin hopi calor, ta bon pa nan cana cu nan boter di awa, pa nan ta hidratada. Anto no bin cu cosnan di balor, pasobra e Camp no ta para responsabel pa cualkier cos di balor cu nan por trece.

Tambe tur dia e muchanan mester trece paña extra, pasobra e muchanan ta yega bunita bisti, pero nan no sa con ta bay caba despues di merdia. Entre 12’or pa 12.30’or mayornan por busca nan muchanan na Plaza Turismo mes.

Reflexion Dia Mundia di Salud Mental

Curashi pa cuminsa bek

Awe diabierna 10 di oktober, Matutino DIARIO ta uni cu resto di mundu pa conscientisacion di Dia Mundial di Salud Mental. Un dia pa para keto, refleha, y reconoce cu salud mental no ta un luho; e ta un derecho humano. E ta e fundeshi silencioso di tur loke nos ta haci, tur soño cu nos ta persigui, y tur transformacionnan den nos bida.

Despues di un siman di reflexionnan riba e mente, curason, y e forsa pa sigui padilanti, awe nos ta yega na un berdad final: sanacion no ta un caminda strit. Crecimiento no ta pasa sin dificultad. Bida ta dobla, troce, ta kibra, y ta cuminsa bek. Y nos tambe ta pasa den e mesun fasenan aki.

Hopi hende ta pensa cu curashi ta nifica pa no laga nada sacudi bo, pa nunca sinti dolor, of pa nunca pidi yudansa. Pero curashi berdadero ta mas suave. E ta e momento cu bo ta scoge pa purba bek despues di cay. E ta e momento ora bo kere den mañan, te hasta si awe ta



sinti pisa. E ta e momento ora bo ta sinti cu bo ta un heroe.

Na Aruba, nos conoce e ritmo aki bon. Despues di tur tormenta, nos isla ta respira bek. Lama ta calma, e aire ta aclaria, y e divi-divi ta lanta su cabes atrobe. Asina e ta cu nos tambe. No ta importa cuanto biaha bida ta pone nos na rudia, semper tin motibo pa lanta, apesar cu e stapnan ta cortico.

Dia Mundial di Salud Mental no ta solamente basa riba conscientisacion. E ta basa riba accion. Laga nos haci

bondad un costumber diario, pa otro, si, pero mas importante, pa nos mes. E trayecto pa sanacion ta cuminsa cu e acto simpel di compacion, pa otro, pero mas importante pa nos mes.

Reflexion:

Bo por cuminsa bek. No ta importa con cansa bo ta, con insegur, of cuanto tempo a pasa. Cu cada salida di solo bo ta haya e mesun promesa: **Bo tin tempo pa sana. Bo tin tempo pa crece. Bo tin tempo pa cuminsa bek. Bo tin tempo pa ta bo mesun heroe prome.**

Columna E Sembrado



Diabierna 10 october. Di bintisiete siman den tempo ordinario aña 2025. Ciclo C.

Calendario Liturgico

Lectura: Yoel 1, 13-15; 2,1-2;

Salmo: 9;

Evangelio: Lucas 11,15-26;

”Ma si ta cu poder di Dios Mi ta saca demoño, esey kieren cu ya caba reino di Dios a bini cerca boso!”Lucas 11,20

Hesus ta duna nos inteligencia y ta habri nos curason pa asina nos scucha y ricibi e luz di Dios. Ora Hesus ta cura esnan cu ta malo, pordona e pecadornan y ta core cu spirito malo ta muestra nos con poderoso E ta. Nos tarea ta di confia y tene fe cu den tur circunstancia E ta yuda nos y lo t’ey semper pa nos. Hesus ta siña nos cu e parabola aki pa stima otro y no cay den odio, maldad of egoismo paso esey lo haci nos mudo y e maldad ta stroba nos Fe. Hesus ta invita nos pa uni cu n’E y laga tur maldad un banda p’asina nos yega e reino di Dios y ta prepara nos spirito pa rechasa tur tentacion di pica y ta habri nos curason pa e Amor di Dios.

Oracion: Señor Hesus, danki pa semper t’ey banda di nos. Cu Bo Señor mi no tin miedo, Abo ta libra nos di tur malo y den bo presencia nos tin paz y nos alma ta trankil. Cada bes cu nos mira e cruz nos ta recorda cu Bo a stima y ta stima nos y ta dispuesto pa duna nos tur cos pa nos salvacion y nos felicidad. Danki pa ilumina nos pa haci semper bon. Danki pa bo amor inmenso pa nos. Amen.

Grupo Centro Pastoral

> SUDOKU <

Conceptis Sudoku

By Dave Green

					8			
		4		6		7		
	8				3		1	
				7	2	5		6
	9						7	
4		5	1	9				
	1		3				8	
		2		1		4		
			5					

Difficulty Level ★★★

6/10

HARI UN TIKI

Un hobencita a yega cas contento y a bisa su mama “Mamie mi tin un bon y un mal noticia”.
 “Prome bisami e bon mi yiu”.
 “Mamie mi a haci un test”.
 “Hopi bon mi yiu mi ta contento pa bo”, y kico ta e malo?”
 “Cu e test ta di embarazo”.

BUSCA PALABRA

CONCIENTIZACION

S T C M X E P O G A S N N Y F X Z Y E N
 N S Y O A T M Y H Y P I O G W N F W J Z
 A S E I N S J S N E E U N I E I H K N N
 N N T N I C A S Q R C S B C C E Q U L D
 O V R T E R I R C L T Y M L L A W A O S
 T I U H U R N E X R R G N S Y U D U N G
 C A M C K K A A N N U U K J C E S N Z Z
 E R N F T N E W N T M U H C W R K I U F
 P E O O I W T X A R I G P Z P L Y Z O F
 S R I S Q L N I M L O Z I W J L I G B N
 A X C Z E I E Y E S G D A Z L N H Z D W
 H V A R C E M L A D X T A C R R A P I L
 Q T M T L Q L O T I R H C C I Y Y T T M
 Y K R M T Y A O O J E Q T V U O C O L V
 X J O D A J N G V S A G B N O D N D Q L
 M I F P N F O Q K E C M O F A E E X X C
 O S N N C D I G L O J R P K D S Z N N T
 T Y I X A Z C A M E D U C A C I O N H M
 B L M R W Q A U D A D I L A E R R V T P
 C Z C J C A N K Y A N H K G P J P A I R
 V L L R F I R V B A Y Y I Q U G X N Y O
 W H T K D O E W N V C G W L B T C M N B
 N C F A X K T T A K Q Q E T U L S E F L
 Y R D V O R N D G S K O X K U G Y K D E
 X Y G V F E I Q S Z H T E Y B F Y Y M M
 E T N E M L A I C I F O E M F J A G A A
 D W G R M N A C I O N N A N Q M E Q E T
 Q G E H P V U R K U D R E G R E P S A I
 T H E W C N H Z C O V P O Q M N X K D C
 B Y L J Z K P G T J D T P L C E B O Y A

ASPECTONAN
 ASPERGER
 AUTISMO
 AWARENESS
 COMUNIDAD
 CONCIENTIZACION
 EDUCACION
 EDUCADORNAN
 ENCURASHA
 FUNDACION
 HERMENTNAN
 INCLUSION
 INCLUYENDO
 INFORMACIONM
 INTERNACIONALMENTE
 NACIONNAN
 OFICIALMENTE
 PROBLEMATICA
 REALIDAD
 SPECTRUM

Answer to previous puzzle

9	5	6	8	4	7	1	2	3
3	7	8	6	2	1	5	9	4
4	2	1	9	5	3	6	7	8
6	1	5	3	9	8	2	4	7
7	3	9	4	1	2	8	6	5
8	4	2	5	7	6	9	3	1
1	8	3	7	6	9	4	5	2
2	6	4	1	3	5	7	8	9
5	9	7	2	8	4	3	1	6

Difficulty Level ★★★

6/09

©2021 Conceptis Puzzles, Dist. by King Features Syndicate, Inc.

©2021 Conceptis Puzzles, Dist. by King Features Syndicate, Inc.

Parlamentario Eduard Pieters (PPA):

'Husticia mester prevalece den caso tragico di Ayden Lanoy'

ORANJESTAD (AAN): Fraccion di PPA a tuma nota den prensa cu finalmente Ministerio Publico lo bay trata e caso tragico di e hoben Ayden Lanoy. Como fraccion di PPA, nan ta hopi satisfecho cu porfin e famia di Ayden, pero tambe e famia di e polisnan involucra, por sinti cu tin un proceso di husticia na caminda. Awor ta yega e momento pa pueblo y pa ambos famia haya claridad, compronde kico a pasa y kico lo sode tambe awor.

Husticia mester prevalece: Parlamentario di fraccion di PPA, Eduard Pieters, a expresa: "Nos como fraccion di PPA ta desea pa husticia prevalece. Esaki ta fundamental pa e famianan y pa confiansa den nos sistema. Nos lo sigui di hopi cerca kico lo ta e veredicto y con e



proceso lo cana."

Pieters a recorda cu den pasado, fraccion di PPA a entrega mocion y pregunta tocante uzo di bodycam y dashcam pa e polisnan. E dos aparatonan aki tin un meta cla: protega pueblo y polis, y duna transpar-

encia y confiansa den un proceso hudicial. Na hopi pais bodycam y dashcam ta normal y investigacion a mostra cu nan por yuda hopi pa duna claridad y sera e casonan hopi mas liher.

Proyecto a cuminsa of

no: Na juli 2025, PPA a manda pregunta na Minister Dowers tocante e proyecto di bodycam. Awor a haya contesta, cu e proyecto piloto di bodycam, ainda no a ni sikiera inicia. Pieters:

"Awor cu nos ta den proceso di presupuesto, nos lo bolbe pidi claridad: kico a para cu e proyecto? El a inicia si of no? Kico a resulta di e prome paso? Pakico a limita na cierto distrito so? Cuanto fondo lo pone pa amplia e proyecto pa tur polis y den tur distrito?"

Esaki ta preguntanan importante, paso sin un plan cla y sin ehecucion, pueblo y Polis no ta haya e proteccion y siguransa cu nan mester tin.

PPA lo sigui vigila: Eduard Pieters a enfatisa cu PPA ta hopi preocupa pa atraso den implementacion di bodycam y dashcam.

"Minister mes a indica cu e proyecto lo inicia 1 di juli 2025. Awor nos kier wak accion concreto. Como parlamentario, mi ta dispone pa sigui pidi contesta cla y concreto y pa duna push pa cu esaki no keda riba papel y promesa den aire, sino p'e bira un realidad."

Fraccion di PPA ta manda palabra di forsa na famia di e hoben Ayden Lanoy, como tambe na e polisnan y nan famia cu tabata involucra. "Casonan manera esaki ta tanta hopi dolor den nos comunidad, pero ta recorda nos, cu solamente cu transparencia, husticia y e medidanan preventivo nos por evita e tipo di tragedianan aki den futuro. Bodycam y dashcam ta un paso esencial, y PPA lo keda firme y vigila esaki pa pueblo," Eduard Pieters a finalisa bisando.

Disney a hisa prijs pa ticket y pase anual pa nan parkenan mas bishita

ORANJESTAD (AAN): Dia 8 di oktober 2025, The Walt Disney Company a cambia e estructura di prijs pa ticket y pase anual di nan dos compleho mas grandi: Walt Disney World na Florida y Disneyland na California. E decision, cu ta encera aumento den prijs di ticket pa miyones di bishitante, cu ta parti di un strategia pa ahusta na aumento di gastonan di operacion y e expansion den nan facilidad y servicicionan.

Segun informacionnan con-firma pa prensa, e prijsnan nobo ta impacta principalmente esnan cu ta planea bishitanan riba dianan cu ta wordo considera di demanda halto, manera dianan di fiesta y vakantie grandi di scol. E anuncio di Disney a wordo amplia pa medianan di comunicacion Mericano, man-era Fox News y CBS News, cu a entrevista voceronan oficial di e grupo. E ahustenan ta inclui tanto aumento di prijs directo pa ticket individual y anual, como promocionnan nobo y beneficienan aplica-

bel pa residentenan local.

E compania ta implementa rutinariamente revisionnan di prijs na oktober. Esaki ta busca pa balansa e demanda y ofrece diferente opcion dependiendo di e temporada. Segun e calender y prijsnan publica pa Disney mes, e ticket di un dia pa adultonan riba dianan di demanda halto (Tier 6) na Disneyland a subi di \$206 pa \$224. E cifra aki ta representa e aumento mas halto desde apertura y ta consolida un promedio historico: e ticket mas caro a aumenta 126% den e ultimo decada, segun estadisticanan publica pa MickeyVisit.com.

E ticket mas barata, conoci como Tier 0, ta keda na \$104 pa adulto y \$98 pa mucha, pero su disponibilidad a wordo reduci na 38 dia den e aña calendario 2025. Na 2024, e fechanan aki tabata solamente 15, marcando un tendencia pa limita e suministro di carchi na e prijs basico.

Na Walt Disney World, e prijs pa un solo dia a aumenta cu

\$10, di \$199 pa \$209. E categoria di economia ta keda na \$119, aunke no tin dianan inmediato disponibel pa ticket na e prijs ey. E aumento di e pase anual tabata varia di \$20 pa \$80 dependiendo di e categoria, afectando principalmente esnan cu ta busca

acceso sin restriccion na e parkenan principal.

E aumento di prijs cu Disney ta implementa pa algun ticket na 2025 ta supera e index di prijs di consumidor di Merca, cu a registra un aumento di 2.9% den e ultimo aña, segun Deadline. Por ehempel, e au-

mento di 8.7% di e ticket di Disneyland mas caro ta riba e promedio aki. E analisis di MickeyVisit.com ta sugeri cu e tasa di aumento durante e ultimo decada ta cuater pa cinco biaha mas halto cu inflacion general.



AMI- Aruba Mindfulness Institute a keda lansa cu e vision di Aruba Wellness 5.0

ORANJESTAD (AAN): Aruba Mindfulness Institute a lansa oficialmente Diamars 30 di September, den Lieverd Lees Café na Biblioteca Nacional. Luna di October ta luna di Salud Mental Mundial, un momento ideal pa presenta e proyectonan nobo di bienestar pa e comunidad.

Presidente, Shanti Augusta Arends y secretaria, Leontine Merkies, a duna un presentacion na famianan, amistad, clientenan y directornan di organisacionan presente. E objetiva di e fundacion ta pa haci educacion y eksperiencia di bienestar accesibel pa tur hende. Shanti ta splica cu “Bienestar no ta un luho of hobby, pero un necesidad pa un isla prospero. Den e era di avance rapido di tecnologia, tambe yama Industry 4.0, ta wak cu e salud mental mundialmente ta cai atras y mester bin cu iniciativas duradero pa crea un pilar paralelo opuesto, cu ta e Wellness 5.0.”

Leontine a ilustra al-



gun puntonan clave di e statuten y a presenta proyectonan actual, cu ta e programa inspirativo y educativo, Gota di Paz, tur Dialuna y Diasabra na Canal 90FM, Mindful Monday Moment na Universidad di Aruba y e Wellness Café cu ta bai cuminsa tur prome Diaranson di cada luna den

Lieverd Leescafe na BNA. E anochi tambe a celebra e prome colaboracion oficial cu Shoco Wellness di Universidad di Aruba cu e proyecto conhunto, Mindful Monday Moment. Juliet Chieuw, cordinador di Shoco Wellness tambe a hiba palabra y a firma y entrega un cheque simbolico na AMI pa marca



e comienso di un colaboracion fructifero cu mas planes di bienestar pa comunidad den futuro.

Despues di un break cu snacks bon surti di Lieverd Lees Café a sigui e anochi cu e Wellness Café, unda Shanti a elabora riba e topico di ‘Kiko ta Bienestar’, hunto a hasi practica di mindfulness, reflexion y despues tur hende tawatin e oportunidad di intercambia cu otro.

A completa e anochi cu canto live di Natie V acompaña pa cu guitarra acustico. Natie a canta un version inspirante di ‘Imagine’ na Papiamento y asina marca e prome anochi exitoso di Well-

ness Café. E siguiente lo ta riba Diaranson 5 di November.

E Monday Mindful Moment ta habri pa publico riba tur e Diaralunanan 12.30-1pm, cuminsando 6 di October te cu 10 di December den e kapel Maria Convent na Universidad di Aruba. Directiva di AMI ta sumamente agradecido na e reaccion positivo y entusiasmo di tur presente y esaki a duna hopi speranza pa realisa e metanan hunto. Manera Tesorero Marla Ponson a bisa “Small seeds today, a forest of impact tomorrow. Let’s grow together”

E noticia riba regularizacion di imigrantenan no a cay den bon tera pa tur hende local

ORANJESTAD (AAN) – No pa tur hende na Aruba e noticia di regularizacion di status pa e personanan imigrante, a cay den bon tera bao diferente ciudadano local y incluso algun residente. Na mesa di redaccion di DIARIO a drenta algun opinion, cu enberdad tin sentido pa bisa cu e asunto aki mester ta bon estructura, pa no kibra e orden social, mas di loke e ta caba. Asina un dama a comenta.

CAOS den trafico: Esaki ta un problema cu ta existi caba y cu ultimo lunanan a bira mas serio. Aruba ta mucho chikito pa tin tanto auto den circulacion, y practicamente riba tur

caminda tin rijnan grandi, por mira den e actitud di diferente automobilista cu nan no tin un debchi di pasenshi, y kier pasa con su sea, dilanti otronan. Trafico stanca na diferente punto y falta di conocimiento di con pa bira den rotonde ta birando e pan di cada dia riba nos camindanan.

Con e ta bay bira awo cu miles di imigrante cu no ta legal lo legaliza nan status, den cualkier di e cuater trayectonan cu Minister di Husticia a anuncia? Mas auto lo sali riba caminda diripiente, ohalae chauffeurnan “nobo” aki lo sa di tin nan papelnan rekeri pa core legalmente, mas

pronto cu nan por, pasobra tin indicacion cu ya caba, hopi di esnan cu ta bay wordo beneficia, ta core auto aki aya, obviamente sin e licencia rekeri.

TRABAO PA UN Y TUR? Otro aspecto ta e sector laboral, pasobra aworaki tin hende local ta solicitando trabao na Horeca, y tin indicacion cu no tur ta haya, aunke ta wordo bisa cu no tin hende pa traha y cu mester di hende di afo pa yena cierto vacaturanan. Pero mirando cu ta hopi permiso lo wordo duna, bon por ta cu e mercado laboral lo haya mas cu un demanda, un saturacion. Cu na dado momento lo bira hopi dificil

pa nos hendenan local, specialmente e hobennan cu ta gradua pa traha den sector di Horeca, ya lo no tin lugar pa nan.

SCOL, SALUD Y VIVENDA: Y asina por sigui menciona kico den nos comunidad e regularizacion aki ta crea preocupacion pe. Cuponan na scol pa un cantidad di mucha cu mester drenta e tereno di educacion, Sector laboral mes y SVb cu lo haya nan mes cu mas hende cu bira malo y bay AO. Comercio ta esun cu por beneficia mas, pasobra tin mas hende pa cumpra den supermercado, pero costo di bida lo haya espacio tambe pa sigui aumenta

sin control. Otro asunto ta vivienda, awendia tin poco vivienda pa nos mes hendenan, corda si e poblacion aumenta cu mas hende cu ta bira legal.

Pa ultimo, a wordo menciona cu e indice di criminalidad tambe lo por subi, mescos cu comercio informal, pasobra bao di imigrantenan ya caba tin hende cu, sin cu riba su mes ta algo malo, ta traha cuminda, coi dushi, etc., ta drecha paña, ta haci trabao di carpinteria, por ehemplo, sin ningun permiso pa haci’e y no ta paga impuesto.

Te aki, parti di e opinionnan cu redaccion a scucha.

Corda parkeer bon pa bo no haya bo ta paga boet

Varios ta esnan cu a ricibi un multa pa mal stacionamento

ORANJESTAD (AAN): Diahuebs mainta, Cuerpo Policial hunto cu Aruparking a tene un accion di control den Klipstraat bin ariba, riba e conducta di automobilistanan pa cu parkeo. Minister di Husticia mr. drs. Arthur Dowers a acompaña e ekipo di control durante e accion aki den cual varios ta esnan cu a ricibi un multa pa mal stacionamento.

Ultimamente tin kibramento di regla di trafico na gran escala, caminda ta crea congestamento di e fluho di trafico, pero tampe ta crea situacionnan peligroso pa otro usuario y peaton. E blokeo di arterianan principal di trafico ta stroba e pasada di entre otro transporte publico pa mas cu binti minuut, pero tambe pa ambulance y servicionan di emergencia cu no por pasa, a conduci cu Polis y Aruparking a drenta accion.

Pa algun siman caba, Aruparking ta activo cu nan campaña di conscientisacion pa cu parkeo den centro di ciudad y a cambia e proceso di parkeo cu awo ta mas facil, pero asina mes hopi ta opta pa ignora nos reglanan di trafico. Mirando cu hopi automobilista ta scohe conscientemente pa ignora e reglanan di trafico, tanto polis como Aruparking lo intensifica nan controlnan pa trece ordo bek.

Minister Dowers ta lamenta cu mester hinca hende den gastonan adicional pa incumplimento cu ley, pero no por laga e situacion bay for

di control. Durante e control diahuebs, a takel varios auto, cu lo costa e doño mas placa mirando cu e lo mester paga pa por haya su auto bek.

Minister Dowers ta enfatisa cu su Ministerio no tin intencion pa crea gasto adicional pa ningun hende, pero ta sigura comunidad cu tampoco por permiti e free for all cu ta tumando luga.

E control di awe, tabata enfoca primordialmente riba mal stacionamento y no tanto ainda riba parkeo sin paga, pero Minister di Husticia a sigura comunidad si cu Aruparking lo intensiva e controlnan riba stacionamento den e periodo

nos dilanti. Parkeo den espacionan di Aruparking sin paga por costa e automobilista un boet di riba 300 florin.

E mandatario di husticia ta urgi comunidad pa mantene nan mes na reglanan di trafico y evita di haya multa of cu autoridad takel bo auto.



Patruxero di Marina Frances observa cerca di Trinidad & Tobago y Venezuela

PORT OF SPAIN: Un barco di guerra di Marina Frances, identifica como 'La Combatante' cu ta un offshore patrol vessel (OPV), a ser mira e siman aki cerca di awa territorial di Trinidad & Tobago, cerca di estado Delta Amacuro di Venezuela.

E patruxero frances a sali for di waf Scarborough na Tobago, y a acerca e zona di influencia unda tambe a nota presencia di barconan di cruise missile guia, USS Lake Erie, y e barco di sosten M/V Ocean Trader, di cual ambos ta pertenece na e mision di Merca contra narcotrafican-

tenan di droga.

Ademas di proteccion di areanan maritimo frances, y trabao di vigilancia riba piscamento, e patruxero P735 di Francia aki, ta specializa den e lucha contra narcotrafico y varios mision den pasado a demostra esey.

Por ehemplo, dia 28 di November 2023, e patruxero a intercepta un barco di pesca di Venezuela na parti zuidoost di Barbados, y aki a haya 3.5 ton di cocaina scondi den 119 bulto. E detenidonan despues a wordo entrega na Gobierno di Caracas.



Kiwanis Club of Aruba casi cla pa nan Halloween Charity Gala

ORANJESTAD (AAN): Miembronan di Kiwanis Club of Aruba (KCA) ta druk preparando pa e Halloween Charity Event 2025, cu e biaha aki ta riba Diabierna 31 di October 2025 na Renaissance Convention Center.

Musiconan confirma un biaha mas ta e bandanan mas popular di Aruba: 'N Fuzion y Solo Banda Show. E maestro di ceremonia ta den man di DJ Metropolis. E ballroom lo ta transforma completamente den un Haunted Mansion inspirado riba e pelicula di horror di Stephen King "The Shining" di 1980.

Por disfruta di un buffet, open bar pa biña y spirits. E fiesta aki ta e oportunidad

mas grandi di Kiwanis Club of Aruba pa recauda fondo, pa asina por sostene diferente fundacionnan y proyectonan cu ta conta riba KCA anualmente, manera Fundacion Ban Uni Man pa Cria Nos Muchanan, Proyecto Back to School, Universal Children's Day, Pasco den bo Bario, Traffic Awareness Campaign, Clint Whitfield Outstanding Students Awards y otro.

KCA kier gradici Elite Productions y House of Mosaic



pa tur e sosten na nos evento tur aña!

Pa tickets, cu ta 450 Florin pa pareha, por acerca cualquier miembro di Kiwanis Club of Aruba of via kiwanisclubofaruba.com. Tambe tickets ta obtenibel na Citgo Essoville, Citgo Wayaca, Citgo Boulevard y Miss 21. E potret pa cortesia 'N Fuzion.

Minister Geoffrey Wever:

Aruba Agri Development Company ta busca Comisario nobo



ORANJESTAD (AAN): Aruba Agri Development Company N.V. ta un compania estatal di cual 100% di e accionnan ta den man di Pais Aruba, cu e meta pa stimula agricultura sostenibel y innovativo na Aruba. Aruba Agri Development Company N.V. tin un rol importante pa fortalece e sector di agricultura y crea oportunidadnan nobo pa inversionistanan local y

internacional den e sector di agricultura di Aruba. Aruba Agri Development Company N.V. su actividadnan principal ta sostene e institucion financiero den e operacion di "Agrifund" pa yuda agricultornan y empresarionan local yega na financiamiento. Tambe ta promove y fortalece e empresaronan den e sector agricola y desaroya e Agri Innovation Park:

un centro pa innovacion, colaboracion unda ta comparti conocimiento den agricultura. Cu e iniciativanan aki Aruba Agri Development Company N.V. ta contribui na un sector agricola mas fuerte, resiliente y moderno pa stimula crecimiento economico y contribui na seguridad di cuminda pa nos isla. Den cuadro di transparen-

cia y "Good Governance" Ministerio di Finansa, Asuntunan Economico y Sector Primario conhunto cu e compania a prepara un perfil pa e miembronan di e Junta di Comisario di e compania. Esaki a keda aproba den Consejo di Ministro. Den e cuadro aki Gobierno di Aruba ta busca un miembro nobo pa e Junta di Comisario di Aruba Agri Development Company N.V. E Junta di Comisario

tin como tarea pa controla y supervisa e directiva, como tambe asuntunan general di e maneho di e compania y alavez duna conseho na e directiva di e compania. E vacatura ta publica den diferente medianan di comunicacion y e periodo pa aplica pa esaki ta cera dia 1 di november 2025. Por haya mas informacion di e vacatura riba rednan social di Minister Geoffrey Wever.

Bucuti y Tara honra como unico resort di Aruba den Top 40 di Condé Nast Traveller 2025



Vanessa a gana riba Dialuna e jackpot 50 mil di Lotto di Dia

ORANJESTAD (AAN): Un persona a gana e jackpot di Diadomingo di Lotto di Dia, y e siguiente dia, esta Dialuna 6 di October, tambe tabatin un ganador di e jackpot. E ganadora a bira Vanessa, kende riba Diaranson a presenta na oficina di Lotto pa asina reclama su premio. Aki e funcionaria a revisa su ticket pa check si el a pone su firma y numbernan di banco na e parti patras di ticket. Ora di scan e barcode, e computer di Lotto a confirma cu Vanessa a gana 50.000 Florin di Lotto di Dia. Mesora a sigui cu e proceso pa transferi e premio electronicamente pa su cuenta di banco. Vanessa a indica cu e ticket ganador el a cumpra na Sheba Lottery.

ORANJESTAD (AAN): Romanticismo, relajacion y excelencia den hospitalidad ta uni atrobe na Bucuti & Tara Beach Resort, Aruba, cu a wordo honra un biaha mas den e Condé Nast Traveler 2025 Readers' Choice Awards, entre e Top 40 Resortnan den Islanan Caribe y keda orgulosamente como e úniko resort Arubano cu a ricibi e reconocimiento distingui. E resort ta igualmente felis di comparti cu su isla stima, Aruba, a ser nombra den e lista prestigioso di Top 20 Islanan den Caribe y Atlantico.

E aña aki, mas di 757.000 lector di Condé Nast Traveler na Merca a participa pa comparti e lugarnan cu a capta nan curason y e experencianan cu nan ta soña pa rebiba. Readers' Choice Awards no ta simplemente un lista, pero un carta di amor for di biaheronan exigente pa e destinacionnan y resortnan cu nan ta stima di bolbe bishita, loke ta refleha

den e cantidad extraordinario di bishitante cu ta bolbe Bucuti & Tara aña tras di aña.

Como e reconocimiento di turismo mas duradero y prestigioso den e industria di biahe, e reconocimiento nan aki ta keda un simbolo constante di excelencia y inspiracion. E lista completo di ganadornan por wordo mira online y lo wordo celebra den e edicion di November.

"Pa wordo nombra un bes mas pa lectornan di Condé Nast Traveler, kende ta biaheronan mundial cu ta reconoce excelencia real, ta un reflejo di nos ekipo pasiona y nos huespednan stima," Crescenzia Biemans, Managing Director ta bisa. E cuida sincero di nos asociadonan, hunto cu e bunitesa natural di nos isla y e promesa di romanticismo, ta crea cu tur pareha cu ta bishita nos ta bai cas cu un historia di amor cu ta bira mas rico cu cada recuerdo nobo."



12de trekking 9 oktober 2025

12de trekking op 9 oktober 2025
Waarvan proces-verbaal was opgemaakt
en ondertekend door A. Maduro namens de
Directeur van de Gaming Control Board, de
getuigen en de directeur van de Landsloterij.

drs. A.P.V. Guillermo

Alle prijzen zijn in Caribische guldens.

UREN VAN UITBETALING:
CURAÇAO : 8.00 - 15.00 (maandag t/m vrijdag)
Tel: 462-4088

ARUBA
Oranjestad : 8.00 - 12.00 en 13.30 - 16.30
Tel: (002975) 824784
San Nicolas : 8.30 - 16.00 (maandag t/m vrijdag)
Tel: (002975) 845200

BONAIRE : Maandag tot en met vrijdag
8 tot 11 uur voormiddag
1 tot 3 uur namiddag
Tel: (0717) 7047

ST. MAARTEN: 7.15 - 12.30
Tel: 0017215424536

SABA: s.v.p. bellen
Tel. 0017215228528

<u>1ste Prijs</u>	
9693	7,500
9694	1,000,000
9695	7,500

<u>2de Prijs</u>	
1502	4,000
1503	200,000
1504	4,000

<u>3de Prijs</u>	
3019	2,500
3020	100,000
3021	2,500

Getuigen:
C. Bregita
J. Rumai

www.landsloterij.org

LANDSLOTERIJ

LANDSLOTERIJ
AT'ABO SA!

Addonsito ta felicita Cas Princesa Aruba



ORANJESTAD (AAN): Den fin di siman Cas Princesa Aruba, bou guia di Jessica Anthony, a tene su di 14 edicion di e certamenann Princess Beauty, Little Beauty y Pre Teen Beauty 2025. E evento bunita tabata den Cas di Cultura na Paseo Herencia cu total 8 participante. MC tabata Addonsito Croes y e huradonan Edson Everon, Ian Schwengle, Joseany Geerman,

Merca a cuminza uza Helicopternan di operacion special na Trinidad & Tobago



PORT OF SPAIN: Ehercito Mericano a bay staciona Helicopternan di 160th Special Operations Aviation Regiment (SOAR) na Trinidad & Tobago, cu tabata abordo di e barco M/V Ocean Trader, cu ta un plataforma uza pa misionnan scondi. Esaki ta asocede apenas algun kilometer leu for di costa Venezolano.

E siman aki por a mira caba imagen di cuatro MH-6M 'Little Birds' y tres MH-60M 'Black Hawk' ta haciendo maniobra cerca di Trinidad & Tobago. E operacion SOAR, cu ta conoci como Night Stalkers, ta apoya operacionnan elite manera Delta Force, SEAL Team 6, y unidadnan special di CISA, cu mision hopi biaha di infiltra y atakenan di precision.

E mobilizacion di e Helicopternan aki a socede despues di declaracionnan recien di president Donald Trump, kende a adverti di un posibel 'Fase 2' di e ofensiva contra cartelnan narcoterorista den Lama Caribe, y cu a aumenta e atencion riba movimentonan militar den e region.



Pierre Thielman y presidente Zuleika Croes tabatin tarea dificil como cu competencia tabata fuerte. E resultado tabata:

Princess Beauty: Zahvia Croes
Little Beauty: Carolynne Kock
Pre-Teen Beauty: My Sheylo Pines

BEST DRESS:

Princess: Zahvia Croes
Little: Lizgreidys Santos
Pre Teen: My Sheylo Pines

PHOTOGENICA:

Princess: Zahvia Croes
Little: Carolynne Kock
Pre Teen: Lesheany van der Berg

TALENTO ONLINE – tema DEPORTE:

Princess: Zahvia Croes
Little: Summer Ogenia
Pre Teen: My Sheylo Pines

MISS AMISTAD: Clayrienne Wolff

POPULAR: Zahvia Croes

BEST HAIR: Souline Mohammed

BEST SMILE: Lizgreidys Santos

DISCIPLINA: Lesheany van der Berg

SOCIAL MEDIA: Clayrienne Wolf



Masha pabien Cas Princesa Aruba y tur reina cu nan bunita presentacion. Pabien n'e reinanan saliente Hailey Comenencia, Carly Maduro, Mia McCollum y Samantha Romero cu bunita reinado. Dia 19 di october, Aruba lo ta representa na Santo Domingo, Republica Dominicana pa dos reina di Cas Princesa Aruba cu ta Hailey Comenencia y Samantha Romero den Mini World 2025.

Enfatizando colaboracion pa un sistema educativo exitoso

Fraccion AVP den dialogo cu rector di Universidad di Aruba

ORANJESTAD (AAN): Miembronan di Fraccion AVP den Parlamento di Aruba Stephany Sevinger y Jennifer Arends-Reyes a tene un bishita di cortesía na Universidad di Aruba pa felicita e rector nobo, Sue-Anne Lee, cu su reciente instalacion como lider academico di e institucion. Den nomber di fraccion henter a extende palabra di pabien y deseo di exito na dje y henter su staff y mas di 800 estudiante cu ta forma parti di e comunidad universitario.

Durante e reunion cordial, a trata varios punto importante relaciona cu e crecimiento y futuro di



Universidad di Aruba. Entre esey, a discuti riba e conexon cu Hulanda, un tema esencial pa fortifica colaboracion academico y intercambio di conocimiento. Tambe a papia di proyectonan innovativo manera Shoco Wellness, cu ta busca pa promove bienestar y de-

saroyo integral pa studiantenan.

Otro topiconan trata a inclui e maneho di idioma, exito academico, e programa di Academic Foundation Year, y diferente reto y colaboracion cu por sigui fortifica e base di e institucion.

AVP a pone enfoke

riba importancia di crea oportunidad pa e studiantenan local, pa cu nan por logra nan diploma aki na nan mesun pais, sin perde conexon cu oportunidadnan di crecimiento na Hulanda y internacionalmente.

E fraccion ta consciente di e gran importancia di sinergia entre institucionnan educacional y e apoyo di e rama legislativo di gobierno, pa asina hiba un sistema academico nacional exitoso y sostenibel. Un colaboracion estrecho entre Universidad di Aruba, e gobierno y Parlamento ta clave pa garantisar cu educacion ta sigui un

prioridad pa nos futuro.

“Nos ke mira nos universidad sigui crece y ofrece educacion di calidad pa forma e proximo generacion di profesionalnan Arubiano. Hopi di nos estudiante ta sigui studia na Hulanda, pero nos kier motiva nan pa bolbe y contribui cu nan conocimiento na desaroyo di Aruba,” segun lider di fraccion, Jennifer Arends-Reyes.

E reunion a termina den un ambiente di respet y colaboracion, confirmando cu pa AVP educacion y formacion humano ta e base pa un Aruba mas fuerte y sostenibel.

Esnan di La Quinta Resort a completa programa di certificacion ACP



ORANJESTAD (AAN): E ta un bon sentimento, ora bo realiza cu mas trabajador laborando den sector di Horeca na Aruba, ta bira experto encunto

cultura di e isla, su historia, y beyeza natural.

Pesey un palabra di pabien ta bay na e team di La Quinta Beach Resort, pasobra segun Aruba

Excellence Foundation, nan a caba di completa e prestigioso ‘Aruba Certification Program’ (ACP), cu ta profundiza nan conocimiento di tur



loke Aruba nifica, tin, y di loke a pasa aden.

Danki na e curso duna pa Aruba Excellence Foundation, nan ta awor

embahadornan mas fuerte di Aruba. Y riba nan cara por mira feliz cu nan ta, y tambe momento di a ricibi certificado.

Creando Futuronan:

Open Call pa hoben- y artistanan na Aruba pa participa den cultura y diseño digital

ORANJESTAD (AAN): E asina yama ‘Creando Futuronan’, na Aruba ta un programa di tayer y “mentorship” den cultura, diseño y pensamiento critico pa hobennan na Aruba, financiado pa Stimuleringsfonds y organiza pa Radical Data den colaboracion cu Plataforma Aruba, Metabolic Foundation, Counter/Narratives y Afaina de Jong.

A base di e necesidadnan local, e team lo comparti hermentnan y inspiracion pa imagina futuronan crea pa nos comunidadnan.

Loke e programa ta: E ta un programa di cultura y diseño digital Caribeño, na unda hobennan ta bin hunto pa imagina y con-



strui futuronan radical.

Special pa esaki, ‘Creando Futuronan’ ta organiza den dos trayecto complementario:

(1) Creando Spark (edad: 12–18): Cuatro tayer creativo na unda participantenan lo explora “coding” creativo, inteligencia artificial, rednan di comunicacion, cultura digital y diseño. No ta rekeri experiencia. Nos ta siña door di

haci pregunta, uzando nos mesun cultura y experianan como e punta di salida, y traha y hunga hunto como un comunidad. E tayer aki lo tuma lugha riba diasabranan atardi na November.

(2) Creando Sustain (edad: 18–30): Un laboratorio intensivo di 8 sesion (2 sesion pa siman) pa artistanan y diseñadornan emergente. Participantenan lo traha

riba proyectonan cu ta refleha nan propio realidadnan, imagina futuronan mas husto pa nos islanan y siña con pa construi un espacio cultural sostenibel.

Nan lo uza metodonan practico cu ta combina storianan personal, siñamento colectivo y Radical Data su enfoke Dissect–Imagine–Create. E sesionnan lo tuma lugha atardi. Tur participante cu completa e programa ta ricibi un pago.

E trayectonan lo start riba Diasabra, 8 di November 2025 y lo bay ta na RAA! (Residencia Artistico Aruba), cu ta pariba di Plaza Nicky Habibe. E idioma lo ta na Ingles, cu sosten na

Papiamento y Spaño.

Compromiso: Ta rekeri presencia completo na e programa. Y lo bay tin un mainta di informacion pa mayornan/voogd, tanto Diasabra 11 di October, y tambe Diasabra 18 di October, for di 10:00 am pa 2:00 pm na RAA! Mas detaye via WhatsApp 568-9420.

Creando Sustain: Sesion habri lo tuma lugha Diasabra, 18 oct pa 11:00 AM na RAA! Entrega un carta di motivacion of video cortico via e WhatsApp dedica na e proyecto: 568-9420. Website di e Proyecto: <https://creandofuturonan.org>

Influencer di Brasil a muri despues di opera su wowo pa logra ‘foxy eyes’



SAO PAULO: E personahe Adair Mendes Dutra Junio, kende ta un popular Influencer riba Social Media, y alavez un Estilista na Brasil, a fayece Diabierna 3 di October despues di a sufrir complicacionnan cu a presenta despues di cirugia estetico. E homber tin 31 aña y tabata reconoci den mundo di moda y beyeza danki na su influencia fuerte den social media.

E operacion, cu a wordo haci na luna di Maart na São Paulo, tabata pa modifica e forma di su wowonan pa logra e asina yama ‘mira di un vos’, esta “foxy eyes”, cu ta un tendencia cu ta alarma e mirada y ta duna e cara un efecto similar cu un pushi. Segun informacion den prensa na Brasil, e cirugia a socede sin autorizacion medico adecua.

Di complicacion pa morto: Despues di a haci e operacion na Maart, Adair Mendes a cuminsa nota con su cara a cuminsa hincha, manchanan a cuminsa aparece, y dolor inmenso tabata dal tanto den dia como anochi. E influencer a relata cu e ta sinti como-sifuera un di e hilonan cu ta mantene su cara tenso, lo a sali for di banda robez di su cara.

Riba social media el a duna informacion con preocupa ta: “For di ora cu nan a opera mi, mi a sinti como sifuera un ader a rementa. Tur cos ta bon na e banda drechi, pero mi cara banda robez tabata basta malo.”

Mientras mas luna a sigui pasa, e infeccion a bira mas grave. E influencer a bishita varios Docter di



cuero, y a busca diferente tratamiento, pero e dolor y manchanan no a bira menos. Finalmente riba Diabierna 3 di October el a ser hiba cu urgencia na Hospital na São Paulo, unda el a muri debi na varios infeccion severo.

Prome cu el a muri, Adair Mendes a presenta un denuncia penal contra e Docter femenino kende a oper’e, y a acuse di negligencia y practica ilegal di medicina. E ciruhano a



nenga tur acusacion pero toch Husticia na Brasil ta investigando e causanan di su morto.

Entiero di e homber a tuma lugar dia 4 di October caba, y na esaki tabata presente su famia y fanaticonan. Riba social media, ta varios figura di moda y entretenimento a expresa nan dolor y a exige tambe pa e caso wordo investiga profundamente.

DEPORTE INTERNACIONAL

Blue Jays a elimina Yankees pa pasa pa ALCS pa prome biaha desde 2016



NEW YORK: Toronto Blue Jays ta bay participa na e American League Championship Series (ALCS) pa prome biaha den 9 año.

Diaranson Toronto a gana New York Yankees 5-2, pa elimina nan y pasa pa e proximo fase di playoffs.

Un total di ocho pitcher di relevo di Blue Jays a combina pa poncha 10 bateador y permiti apenas 6 hit.

Closer Jeff Hoffman a saca e ultimo 4 outnan di e wega.

Despues di permiti un hit di Aaron

Judge cu a impulsa un careda, Hoffman a poncha Cody Bellinger pa caba e wega.

E careda ganador a wordo impulsa pa Nathan Lukes ora cu den di 7 inning el a bati un hit pa impulsa dos careda.

Esaki a bin despues di un error cometi pa segunda base di Yankees Jazz Chisholm.

Myles Straw a sigura e triunfo cu un hit pa impulsa un careda den di 8 inning.

Nobato di Thunder Topic ta bay perde 4 siman despues di operacion na su testiculo



OKLAHOMA CITY: Nobato di Oklahoma City Thunder Nikola Topic ta bay perde por lo menos 4 siman, despues cu Dialuna el a haci un operacion na su testiculo.

E ekipo a bisa cu e hungador di

Serbia di 20 año ra bay wordo revalua dentro di un maximo di 6 siman.

Topic tabata e di 12 escogencia den e draft di NBA di 2024 y a perde e temporada completo, mientras cu e tabata recuperando di un scheur na su ACL.

E año aki el a hunga den e Summer League y Diadomingo a cuminsa

e wega di pre temporada contra Charlotte Hornets.

El a caba cu 10 punto y 7 asistencia den 31 minuut, den e wega cu OKC a gana 135-114.

KD comfortable den su debut den pre temporada



HOUSTON: Diaranson anochi Kevin Durant a faya su tres prome intentonan di anotacion, den su prome wega cu Houston Rockets.

Despues di esey e no a faya mas y a caba cu 20 punto den 23minuut hunga, pa yuda Rockets gana nan wega di pre temporada contra Utah Jazz cu e score di 140-127.

“Mi a sinti mi mes na cas desde cu mi a yega akinan 3 of 4 siman pasa, pues mi a sinti mi mes normal”.

Mi ta sinti como si fuera mi ta aki

pa basta tempo caba, Durant a bisa despues di e wega.

El a indica cu su compañeronan di ekipo nobo a dune un bon bini hopi bon.

Den luna di Juli Durant a wordo cambia di Phoenix Suns pa Rockets, a cambio di Jalen Green y Dillon Brooks.

E 15 biaha All Star y 4 biaha ganador di oro Olimpico ta uni su mes na un ekipo hoben cu hopi potencial.

Hulanda no a impresionar pero a tuma un paso mas pa Copa Mundial di 2026



MALTA: Despues cu un tempo atras Hulanda hungando na cas a gana Malta 8-0, Diahuebs hungando na Malta e wega a bay un tiki mas dificil.

Hulanda, cu a cuminsa sin Memphis Depay, trepan tabata tin problema a score, mientras cu Malta a haci su best hungando defensa.

Na halftime e score tabata apenas 1-0 na fabor di Oranje y na final e wega a caba cu e score di 4-0 pa e

Hulandesnan cu awor ta un stap mas cerca di clasificacion pa Copa Mundial di 2026.

E anotadornan di gol pa Hulanda tabata Cody Gakpo (2 penalty), Tijani Reijnders y Depay.

Hulanda ta keda na prome lugar di nan grupo cu 13 punto den 5 wega, sigui pa Polonia y Finland, ambos cu 10 punto.

SUPER CARD SUPER DEALS



COMFORT
CLASS

IMAX

VIP

Monday
Thursday

8.00^{AWG}

10.00^{AWG}

11.00^{AWG}

Friday
Sunday

9.00^{AWG}

11.00^{AWG}

12.00^{AWG}

**BEST CINEMA AT
THE BEST PRICES!**

Sign up today at any **The Movies** location
and **start enjoying great benefits!**

Señora Audrey Croes, Relacionista Publico di N.V. Elmar

NV Elmar ta colabora cu Biblioteca Nacional Aruba y ta relansa su mascota Chispito

ORANJESTAD (AAN): Biblioteca Nacional Aruba (BNA) ta cla pa cuminsa cu Festival di Buki pa Mucha 2025 dia 2 di November proximo. Esaki ta e di 33 Festival di Buki pa mucha cu e tema "Aventura na granel!"


Relacionista Publico di N.V. Elmar, señora Audrey Croes, durante un conferencia di prensa a anuncia cu relaciona cu e di 75 aniversario di N.V. Elmar, e compania di electricidad lo ta den colaboracion cu Biblioteca Nacional Aruba. Segun señora Croes, esaki ta e momento corecto pa relansa Chispito.

Chispito ta e mascota di N.V. Elmar y ta bay tuma parti di e festival di buki. Den e buki **Zap! Zap! Zzzienng!** E aventuranan di Chispito, nos muchanan



lo disfruta di e aventuranan y personalidad di Chispito, un mascota amigabel, curioso y cu hopi energia.

Señora Croes a splica cu N.V. Elmar ta lansa Chispito den e festival di buki e aña aki pa conscientisa mayornan y muchanan tocante peligernan y e importancia di seguridad di coriente. Y por spera Chispito den e recoridonan na scolnan durante Festival di buki como tambe durante di lesamento di buki na Biblioteca Nacional.



DEPORTE INTERNACIONAL

Arnautovic a anota 4 gol y Austria a marca record cu victoria di 10-0 riba San Marino



AUSTRIA: Nunca antes e seleccion di futbol a gana un wega cu un ventaha asina grandi.

Diahuebs hungando nan wega di clasificacion pa Copa Mundial di 2026 na cas, Austria no tabata tin misericordia y a gana San Marino 10-0.

Esey a bira e record nobo pa Austria, pa loke ta e wega gana cu e diferencia mas grandi di gol.

E record anterior tabata 9.

E homber grandi den e wega tabata Marko Arnautovic, kende a anota 4 gol.

El a anota den di 8, 47, 83 y den di 84 minuut.

E otro anotadornan di gol tabata Stefan Posch (2), Romano Schmid, Michael Gregoritsch, Nikolaus Wurmbrand y Konrad Laimer.

Dinamarca a duna Belarus un sota formal di 6-0



EUROPA: Dinamarca for di comienzo te final a domina nan wega pa clasificacion pa Copa Mundial di 2026 contra Belarus.

Cu 4 gol den prome mitad y 2 den di dos mitad, Dinamarca a gana e wega 6-0 y ta keda na prome lugar di nan grupo di clasificacion cu 7 punto den 3 wega.

Belarus ta keda na ultimo lugar sin punto.

E prome gol di Dinamarca a wordo anota pa Victor Froholdt

den di 14 minuut, sigui pa e 2-0 anota pa Rasmus Hojlund den di 19 minuut.

Den di 45 minuut tabata Hojlund mes kende a anota e 3-0 y net su tras Patrick Dorgu a pone e score na 4-0.

E di 5 gol di e Danesnan a wordo anota pa Anders Dreyer den di 66 minuut y tabata Dreyer mes kende a anota e di 6 gol den di 78 minuut.

Faroe Islands a sorprende Montenegro pa mantene speranza pa yega Copa Mundial



FAROE ISLANDS: Diahuebs hungando na cas Faroe Islands a mantene e speranza bibo, pa por clasifica pa Copa Mundial di 2026.

Nan a logra un victoria di 4-0 riba Montenegro y awor ta na di 3 lugar di grupo L di clasificacion cu 9 punto en 6 wega.

Croatia y Republica Checo a empata y ta keda na prome y di dos lugar, ambos cu 13 punto.

E prome gol di Faroe Islands a wordo anota pa Hanus Sorensen den di 16 minuut y un auto gol di Milan Roganovic den di 36 minuut a pone e score na 2-0.

Pa sigura e triunfo Sorensen a anota un biaha mas den di 55 minuut, mientras cu e di 4 gol tabata un penalty anota pa Arni Federiksberg den di 72 minuut.

Escocia a gana Grecia pa subi na di dos lugar di grupo di clasificacion



ESCOCIA: Hungando na cas Escocia Diahuebs a logra un victoria importante den nan intento pa clasifica pa Copa Mundial di 2026.

E Escocesenan a logra bin bek pa gana Grecia 3-1 y awor ta subi pa di dos lugar di grupo C di clasificacion cu 7 punto den 3 wega.

Dinamarca tambe tin 7 punto, pero cu

un mihor diferencia di gol.

Den di 62 minuut Kostas Tsimikas a anota pa Grecia, pero apenas 2 minuut despues Ryan Christie a anota e 1-1 pa Escocia, sigui pa e 2-1 di Lewis Ferguson den di 80 minuut.

Pa sigura e triunfo Lyndon Dykes a anota e tercer gol den di 93 minuut.



Noticianan for di Hulanda

Despues cu el a wordo deteni a realisa pakico e Hulandes a bula pa Malta 18 biaha den un aña



AMSTERDAM: Den un aña di tempo un Hulandes di 60 aña a bi- aha pa Malta.

Ta conoci cu hopi hende, incluy- endo Hulandesnan, gusta bay Malta pasa vakantie, pero 18 biaha den un aña ta bastante remarcable.

E homber na dado momento a wordo deteni na aeropuerto cu droga den

su posesion.

A resulta cu motibo pakico e Hulan- des tabata biaha asina hopi biaha pa Malta ta cu e tabata trafica cocaina y ketamine pa e isla.

Su caso recientemente a keda cla y el a wordo condena na un castigo di prison di 4 aña y 2 luna.

Durante control a detene un persona cu un debe di belasting di mas cu 1 miyon euro



TILBURG: Durante di controlnan di polis rond Hulanda na diferente ocasion ta topa cu casonan re- marcable, unda cu por ehempel ta haya chauffeur cu arma di candela, droga of otro articulonnan ilegal. E biaha aki durante un control cu tabata un cooperacion entre cuerpo policial y servicio di im- puesto, a topa cu un persona cu tin

un debe di belasting di mas cu 1 miyon euro.

Mirando esaki e agentenan poli- cial presente na e sitio a detene e homber mesora.

Banda di esaki un otro persona a wordo deteni.

E homber aki ainda mester sinta un castigo di prison di 60 dia.

Homber di 40 aña deteni pa morto di muher di 58 aña na Zaandam



ZAANDAM: Un homber di Zaandam di 40 aña a wordo de- teni na Amsterdam Diahuebs atardi, pasobra posiblemente e lo ta involvi den e caso di morto di un muher na Zaandam tambe di 58 aña, polis a meld.

Diahuebs mainta e muher a wordo haya herida den un cas den Pinasstraat na Zaandam, unda cu durante cu e tabata wordo reani- ma el a fayece.

Polis ta sali for di e punto di bi- sta cu e muher tabata victima di un crimen.

Prome cu e homber a wordo de- teni, polis a comparti descripcion di e sospechoso.

Segun polis, e homber deteni ta cumpli cu e descripcion duna.

Awor e rol di e sospechoso den e morto di e muher ta wordo in- vestiga.

Hulandes traficante di droga condena na morto na Indonesia ta sali y por regresa su pais



JAKARTA: Indonesia a laga dos Hulandes di edad halto liber, cu tabata den prison na e pais debi na traficacion di droga.

E Hulandesnan, di cual uno taba- ta condena na morto, a sali liber despues di reunionnan diploma- tico di minister demisionario Van Weel di VVD.

Recientemente e gobierno Indone- s a bay di acuerdo pa manda e pres- onan aki bek pa Hulanda.

Esaki ministerio di Asuntonan Ex- terno a duna di conoce Diahuebs.

E decision a wordo tuma despues cu e minister coordinador di Hus- ticia y Derechonan Humano di Indonesia Yusril Ihza Mahendra, Diahuebs na Jakarta a sinta cu Van Weel.

Na Indnesia frecuentemente ta condena traficantenan di droga na un castigo di morto, pero pa alred- edor di 10 aña no a ehecuta e tipo di castigo ey mas.

Na Hulanda husticia lo dicidi kico lo sosode cu e dos presonan.

Noticia Internacional

London: Polis a detene 46 persona den e operacion mas grandi contra ladroncia di celular



Autoridadnan Britanico a detene 46 persona despues di a descubri un organizacion internacional cu a manda miles di aparato pa e pais Asiatico.

Polis di London a bisa cu nan a dismantela un gang criminal sospecha di a contrabanda 40.000 telefon celular horta pa China den nan operacion contra ladroncia di telefon mas grandi te cu awor, cu a resulta den 46 detencion den e ultimo dos simannan.

E gang por ta tras di un calculacion di 40% di tur ladroncia di telefon na London, polis a bisa, cu mescos cu otro ciudadnan rond mundo a mira un aumento den aparatonan horta den añanan recien, impulsa pa un mercado internacional lucrativo y facilita pa huida rapido riba brommer.

“Haya e cargamento original di celularnan tabata e punto di salida di un investigacion cu a descubri

un ring di contrabando internacional cu nos ta kere por tabata responsabel pa exporta te cu 40% di tur telefon horta na London,” segun Chief Inspector Mark Gavin.

Polis a bisa den un comunicado diamars cu e investigacion a cuminsa aña pasa ora cu un caha conteniendo mas o menos 1.000 iPhone a wordo descubri den un deposito cerca di Aeropuerto Heathrow di London mientras cu e tabata wordo manda pa Hong Kong.

E grupo a dirigi especificamente riba productonan di Apple pa motibo di nan rentabilidad den exterior, polis a bisa, y a haya cu nan tabata wordo paga te cu 300 liber (\$403.02) pa cada telefon di Apple, cu por a bende pa te cu \$5,000 na China.

“Esaki ta e ofensiva di mas grandi riba ladroncia y atraco di telefon celular na Reino Uni, y e set di

operacionnan mas extraordinario di su tipo cu Polis Metropolitano a yega di tuma,” asina comandante Andrew Featherstone, e lider di Met den e lucha contra ladroncia di telefon celular, a bisa.

“Nos a dismantela rednan criminal na tur nivel, for di ladronnan di caya te na gruponan di crimen organisa internacional cu ta exporta desenas di miles di aparato horta tur aña.”

Di e detencionnan, 11 a tuma lugar na momento cu agentenan a dirigi riba gangnan cu tabata atraca vannan di mensahero cu tabata entrega e iPhone 17 nobo, y un homber cu a biaha entre London y Argelia mas cu 200 biaha den e ultimo aña a wordo para cu 10 telefon horta na Aeropuerto di Heathrow, mientras cu dos homber den nan 30 aña a wordo aresta riba sospecho di labamento di placa £400,00 a wordo haya na un tienda di telefon den noord di London.

Alcalde di London, Sadiq Khan, a bisa cu ladroncia di telefon tabata tumando luga riba un “escala industrial” y a urgi fabricantenan di telefon manera Apple y Samsung pa tuma pasonan mas grandi pa preveni uso di celularnan horta.

INTERNACIONAL NOTICIA FOR DI COLOMBIA

DAMA A ENTREGA SU YIU CU A MATA TAXISTA

MEDELLIN: Diaranson mainta pa 5:50 am, ora cu solo ainda no a sali, un caso di atraco violento a ser cometi riba



un Taxista coriendo den bario La Piñuela, na parti noordoost di Medellin. E tabata transportando dos hoben cu el a piki na Medellin, y nan a hibe pa un caya sin salida. Aki diripiente den e auto nan a cuminsa

atake, y purba di kita su pertenencia y placa cu el a gana henter anochi y marduga. Ora cu e Taxista a resisti, nan a cuminsa hinke cu cuchiu. Despues di esey nan a core laga e homber mortalmente herida cu 9 hinca na su curpa. E Taxista Gabriel Jaime Rave Rodriguez tin 67 aña di edad. Polisnan a start cu buskeda mesora, y agentenan na Santa Cruz a logra gara un hoben Miguel Angel Botero Atehortua di 19 aña, kende tabatin un herida di cuchiu tambe debi na luchamento cu e Taxista. Den oranan di mainta, un muhe a presenta na Centro di Servicio Hudicial di Ministerio Publico na Medellin, y a yega cu su yiu homber di 17 aña pa entreg'e na Polis. Su paña ainda tabatin mancha di sanger, y e mama a tuma bon decision di entrega su yiu na autoridad. A resulta cu e ta e otro hoben cu a comete e atraco riba e Taxista.

TURISTA MERICANO TIRA 6 BIAHA NA EL PEÑOL

MEDELLIN: Un turista Mericano cu tabata yegando Piedra del Peñol y Guatapé, wordo intercepta pa dos



criminal riba motorcycle cu a bay riba dje pa comete atraco cu idea di horta su cadena di oro na su garganta. Aki e turista a cuminsa lucha cu e criminalnan, kendenan a saca arma di candela, y a cuminsa tira. E turista a ricibi seis impacto di bala.

Mesora unidadnan di Polis di El Peñol, como tambe Cuerpo di Bombero di El Peñol a acudi na e sitio pa yuda e turista, y tambe un dama cu tabata pasando den e area y a ricibi impacto di bala tambe na su brazu. Riba potret por mira Bomberonan ta atende e turista, sperando yegada di Ambulance. Cu urgencia a hibe na un Hospital na Rionegro, unda e ta hospitaliza den Intensive Care den estado critico, y Docternan ta tratando di salba su bida. Docternan a informa Polis cu e heridanen ta hopi grave, y tin di mira con su curpa ta reacciona. E atracadornan a huy riba e motorcycle, y Polis a intercepta esaki riba e caminda pa Guatapé, unda e manehador a spanta y a bay dal den diferente motorcycle staciona. Autoridad a logra detene solamente e manehador, net dilanti un negoshi comercial. E otro delincuente a baha di e motorcycle un rato prome. E dama herida cu no conoce e turista, tabata djis canando eybanda y a resulta herida. Pasobra e atracadornan tabata tira pa loco y el a haya impacto di bala. El a wordo atendi na Hospital San Juan de Dios na El Peñol. Polis a bisa cu e atraco a ser cometi door di grupo criminal procedente di Valle de Aburrá.

“like” us on
facebook
facebook.com/diarioaruba

Noticia Internacional

INTERNACIONAL

NOTICIA FOR DI VENEZUELA

PADRINO LOPEZ TA ADVERTI DI POSIBEL ATAKE

CARACAS: Ministro Venezolano di Defensa, Vladimir Padrino López a alerta pueblo di su pais riba e necesidad pa prepara, pa cu un eventual atake di Merca. El a bisa esaki for di estado La Guaira, unda el a supervisa e activacion di training militar cu ta pertenece na 'Operacion Independencia 200'. "Mi kier alerta poblacion cu nos tin di prepara nos mes. E forma irracional cu imperialismo ta actuando ta grosero, vulgar. Nan ta inventa cosnan di nada pa culpa Venezuela di algo grotesco. Ningun hende ta kere nan," e Ministro a indica. Den e sentido ey el a bisa cu afortunadamente "e opinion publico internacional no ta mescos cu algun aña pasa, ya un mundo nobo a emergi, e mundo di BRICS, pa respet na soberania, na gobernacion mundial, esey ta e mundo cu ta sperando nos, pero na forma interino ta pasa cosnan manera cu loke ta socede e momento aki." Segun e Ministro, semper ta bon pa alertar hende, pero tin di pasa pa mas accion. E no kier trece 'alarmismo' den pueblo, djis kier pa boso realiza den loke nos ta bibando, y mientras boso ta mihor prepara, e cosnan lo bay core mucho mihor. El a corda cu gobierno Mericano tin "hopi forma di ataca nos, no djis na forma militar, sino tambe cu introduccion di forzanan special pa comete sabotahe di servicio publico, asesinato selectivo, entre otro.

CONVIASA CU SERVICIO AEREO PA RUSIA Y CHINA

MAIQUETIA: E aerolinea Conviaza ta bay cuminsa cu un ruta figo entre Venezuela, Rusia, y China, cu lo bay tin un frecuencia di vuelo cada dos siman. E trayecto nobo lo bay ta for di Caracas - Moscu - Canton, y lo bay haci uzo di e avion Airbus A340-600. E aerolinea a describi e ruta aki como "un di su rutanen mas ambicioso te cu awor". Cu e itinerario nobo aki, ta formaliza acuerdonan politico y comercial entre Gobiernonan di Venezuela, Rusia, y China.

AVION MILITAR DI RUSIA A CORE BANDONA PAIS

CARACAS: Un avion cu ta registra na Forza Aereo di Rusia, modelo Ilyushin Il-62M, cu matricula RA-86495 a lanta vuelo Diaranson for di Aeropuerto Simon Bolivar di Maiquetia na Venezuela, despues di tabata estaciona eynan pa un siman largo den un bishita misterioso. Riba e website FlightRadar 24 por a nota cu e vuelo a sali marduga pa 1:20 am, y despues di a caba di cruza Lama Caribe, e avion a paga su transponder mey-mey di Oceano atlantico, y despues a bolbe cende esaki ora cu e tabata cerca di costa Africano. Siman pasa e avion a sali for di Moscu, y a haci un escala na Argel, na parti nort di Africa. Ningun oficial di Gobierno Venezolano a duna splicacion di e motibo di su bishita. Pero tur hende a haya raro cu e avion a dicidi lanta bay marduga y bandona e pais.



Crisis na Bolivia: Suministro di combustibel lo baha te cu 70% e siman aki

Bolivia un biaha mas ta confrontando un crisis di combustibel cu ta empeorando. Armin Dorgathen, presidente di Yacimientos Petroliferos Fiscales Bolivianos (YPFB), a anuncia diamars cu e siman aki lo tin un "gap" den e distribucion di diesel y gasolin, cu suministran solamente ta cubri 70% pa 80% di e demanda di e pais. Segun e presidente di e compania estatal di petroleo, no por garantiza suministro di combustibel te ora cu Ministerio di Economia aloca e recursonan necesario pa su importacion. Di acuerdo cu e Presupuesto General di Estado 2025, mas o menos \$56 miyon pa siman ta wordo aloca pa compra di combustible, un montante insuficiente pa cumpli cu e demanda domestico. Segun e de-



claracionnan anterior di Dorgathen, mas o menos 60 miyon dollar pa siman ta necesario pa garantiza un suministro regular. Despues di e anuncio di un irregularidad di distribucion inminente, pompnan den varios estado a basha abao diaranson mainta cu filanan sin fin di vehiculo y truck wardando pa yena nan tanki. Mientrastanto e Confederacion di Sindicato di Chauffeur Boliviano a declara estado di emergencia.

Pa e ultimo dos añanan, Bolivia a bin ta experimentando scarcedad cada bes mas prolonga di diesel y gasolin, debi na e creciente dificultadnan di importacion causa pa e falta di dollar resultante di e crisis economico. E pais ta importa casi 90% di su diesel y 56% di su gasolin, y tambe e ta bende esaki na un prijs mas abou cu e prijs real debi na su politica di subsidio, cu a debilita su economia mas ainda.

Intoxicacion di alcohol na Brasil: Cinco morto confirma, gobierno ta pidi pa reduci propaganda di alcohol



E gobierno di Brasil diaranson a recomenda pa e plataformanan di comercio digital grandi "reduci" nan anuncionan di benta di bebida, despues cu cinco persona a fayece pa motibo di intoxicacion di bebida cu metanol a wordo raporta. Agencia Nacional di Consumidor (Senacon) a bisa

cu e medida tabata voluntario, a pesar di a indica den un declaracion anterior cu e suspencion tabata "temporal." Awo, sinembargo, e instancia ta conseha solamente companianan pa revisa nan propaganda y "mecanismo di verificacion interno" pa preveni e oferta di bebida "sin ver-

ificacion di origen, label of registracion." Entre e plataformanan notifica pa e instancia ta Shopee, Mercado Libre, Amazon, Casas Bahia, y Carrefour. Senacon a splica cu companianan mester percura pa tur bebida bendi ta original, fabrica pa proveedornan cu permiso, cu label y registran apropiada. Y nan a recorda cu bendemento di bebida adultera ta wordo considera un ofensa serio y por conduci na multa y persecucion penal. Den total, tin 24 caso confirma di intoxicacion, casi tur concentra den e estado di São Paulo, esun mas pobla di e pais.

Noticia Internacional

Parlamento Europeo a pidi pa aumenta inversion den America Latina pa contraresta e presencia di China y Rusia

Parlamento Europeo a urgi gobiernonan Europeo pa aumenta inversion den Latino America y Caribe pa contraresta e presencia di China y Rusia den e region, basta cu balornan Europeo pa loke ta trata derechonan humano, transparencia y sostenibilidad ta wordo respeta.

Parlamento Europeo a aproba un rapport cu 354 voto en favor, 195 contra y 77 abstencion, pidiendo pa “mas colaboracion strategico” basa riba balornan comparti pa atende “tensionnan y rivalidadnan mundial creciente entre podernan.”

E iniciativa di “Global Gateway” cu tin como meta pa aumenta inversion di exterior ta wordo mencionada como ehempel.

E rapport ta destaca un “oportunidad historico pa



tur dos region fortalece nan alianza y proteha nan mes di tensionnan geopolitico creciente.”

E decision ta destaca e conclusion di e negociacionnan di acuerdo comercial UE-Mercosur y ta enfatisa su “importancia strategico.”

E texto ta encurasha paisnan di UE, Latino America y Caribense pa coordina nan posicionnan

globalmente y ta señala cu e proximo cumbre UE-CELAC, programa pa november na Santa Marta, Colombia, lo ta un reunion significativo.

Parlamentarionan Europeo a condena e violacionnan di derechonan humano y e restriccion di libertadnan na Nicaragua, Cuba y Venezuela, y a adverti tocante e erosion di democracia den e region for di 2019.

Merca: Dos republicano ta vota cu democrata den Senado pa blokea e atakenan riba barconan di contrabando di droga



Cu un votacion di 51 contra 48, un mayoria di e republicanonan di Senado a rechasa un mocion pa aproba un medida dirigi na pone un fin na e practica di presidente Donald Trump di ordena unilateralmente atakenan riba barconan sospecha di transporta droga.

Dos republicano di Senado, Rand Paul di Kentucky y Lisa Murkowski di Alaska, a vota hunto cu e democratanan den apoyo di e mocion pa aproba e

resolucion conhunto di e Comité di Relacionnan Exterior, pero e mocion no a logra pasa.

Senador democratico John Fetterman di Pennsylvania tabata e unico miembro di su partido cu a join e republicanonan den votacion contra di e mocion pa aproba e atakenan.

“Mi ta sostiene completamente e lucha contra e plaga di cartelnan di droga cu ta trafica den nos nacion,” Fetterman a bisa den un post riba X luna pasa.

Brasil ta inverti 56.27 biyon dollar den modernisacion di nan industria

SÃO PAULO: Brasil, e economia mas grandi di Latino America, a fortalece su compromiso pa lansa un “industria nobo” cu ta mas berde, mas productivo, innovativo, y digital, como strategia pa aumenta su competitividad den e mercado internacional.

Pa esaki, e gobierno ta inverti aproximadamente \$56.27 biyon te cu 2026 pa desaroya un plan industrial nobo.

Esaki a keda enfatisa durante un evento oficial di e vise presidente di Brasil Geraldo Alckmin, kende a destaca e necesidad pa fortalece e industria nacional, specialmente dilanti di e competencia di Asia.

E strategia ambicioso ta enfoca riba expansion di cadenan agro-industrial



sostenibel y e sector di salud; promove e bioeconomia, decarbonisacion, y transicion y seguridad di energia; y mehoracion di infraestructura sostenibel, saneamento, vivienda y movilidad.

Tambe ta busca pa promove e transformacion

digital di e industria y implementa tecnologianan cu ta importante pa soberania y defensa nacional.

“Esaki ta esencial pa competi den e mercado cu competencia internacional”, a enfatisa e Minister di Desarojo, Industria, y Comercio.

Exporta pa crece Alckmin a señala cu, pa hopi sector, manera aviacion y defensa, exportacion ta un condicion no-negociabel pa sobrevivencia y crecimiento di negoshi.

Na mes momento, comercio externo ta aumenta e resiliencia y oportunidadnan di crecimiento di negoshinan chikito y mediano, cu ta e fundeshi di e economia di Brasil.

Den e sentido aki, el a enfatisa e importancia di programanan di incentivo pa calificacion y internacionalisacion y a elogia e trabao realisa pa e Agencia di Promocion di Comercio y Inversion di Brasil (ApexBrasil) pa garantisa cu companianan innovativo tin un miho chens di haya un pia den cadena di

balor internacional.

Pa loke ta trata e pais anfitrión, cu ta e di tres economia mas grandi di mundo, Alemania a importa un total di \$5.8 biyon den productonan Brasileiro na 2024 y, segun ApexBrasil, ta ofrece e pais mas cu 390 oportunidad, cu un enfoque riba mashinnan y ekipo di transporte, productonan di cuminda, materia prima y productonan fabrica.

E agencia Brasileiro tambe ta spera cu e acuerdo entre Mercosur y Union Europeo lo ta na vigor pa april 2026. E acuerdo aki tin e potencial pa aumenta exportacion pa e bloke cu te cu 7 biyon dollar riba termino corto y tambe por impacta e participacion di Brasil den e Hannover Messe.

Pa chica Pos - Habri tubería y wc.
Servicio lihe y confiablel.

Experiencia ta manda

CICLONE
 Septic Tank Service

Tel: 564-0607 / 734-0607

CONSTRUCCION REMODELACION

Nos ta traha y drecha tur sorto di dak: shingle, eterniet, panchi, zink. Pega bloki, tegels, plafond, pleister, pone porta, lanta cura, basha vloer, construccion di cas y apto bon prijs. Free quotation.

Tel: 561-2137

TA CHAPI
 Corta mata.
 Ta tira sushi afo. Nos ta hardineria completo na super bon prijs.

Tel: 569-8003

SUPER OFERTA

garage door 9'x7', sliding windows, acrylic sheets, bandera comercial, rifle pellets 4.5 mm, toilet seats, 7" hard plastic letters & numbers pa cas & negoshi. (TUR 50% OFF).

Varios parts pa bentana di alum. Te ainda specialista pa RAYNOR garage doors y motor, roldeur pa deposito & parts y tambe Came y Proteco sliding gate elec. opener parts. Servicio & benta ta solamente ariba afspraak, cita, appointment.

9-12 & 3-6.
E. Arends: 594-1902

PROMASTER

Pa laba tapijt, sofa, tur matras.
 99% desinfecta.

Tel: 582-0383 / 593-3538
Leslie Maduro

DIRECTV

E mihor TV na Aruba.
 Movies, sports, news, novelas, kids y hopi mas.
 Bon prijs, bon servicio.
 Yama awo. Cell: 733-5762

HERO BIEU

Auto bieue den cura?
 Nos ta pikje pornada.
 Frigidaire, wasmachine, dryer, stoof, airco, bateria.
 Yama 561-4297 of 561-5179. Arubiano balente.

WASMACHINE

Ta drecha wasmachine, dryer, stoof, forno.
 Ta drecha, service y instala airco. Tel: 742-2518.
 Ta drecha na cas mes.

TA CHAPI
 tira sushi afo y transporte.

Cel: 594-5115

DIARIO

Pa noticia, cumpleaños, comentario, redaccion: noticia@diario.aw

Tel: 582-6747

Lector malcontento cu cierto hendenan cu bay bebe bira burachi y haci fastioso ora tin cualkier wega riba veld

ORANJESTAD(AAN) Un lector a tuma contacto cu DIARIO, pa haci un critica riba e comportacion di cierto hendenan cu ta bay wak weganan, sea di mucha of di adulto, na un of otro veld deportivo, pero mas tanto nan ta bay pa sinta bebe, bira burachi y haci fastioso.

E ciudadano a comenta cu esaki no ta di awo cu tin hende cu, incluso, ora ta trata di training of wega mes sea baseball of futbol, nan ta bay "apoya" un

yiufi di nieto, y na dado momento ta cuminsa tira palabra mahos pa otro hende riba veld of ta insulta hasta e referi y e muchanan, pasobra nan gusta sinta bebe bira burachi y busca problema. Y tambe ta sosode ora tin wega di adultonan. E hendenan aki ta carga e ambiente di un actitud toxico, cu hopi di esnan cu a bay wak e wega ta dicidi di sali bay, pasobra e situacion ta bira insoportable. Un masha mal ehemplo dilanti e mucha y hobennan presente, pero tambe pa otro mayornan y pa hende grandi.

Pero mas mahos y tristo ainda ta cu en-

tre esnan cu gusta haci bochincha tin hende muher cu tambe ta bebe bira burachi y ta cuminsa insulta otro muhernan cu ni sikiera ta conoce otro, y cu no ta participa den e tiramento di palabra malo. Recientemente esaki a sosode cu un dama, cu a bira obheto di tiramento di palabra malo, seña mahos cu dede, y actitud onbeschoft di un hende muhe cu e no conoce, y cu hasta cu su pareha el a cuminsa mete. Ta parce cu e dama a dicidi di sali for di e lugar y bisa su pareha cu e no ta bolbe acompaña pasobra esaki ta hopi incomodo pe, cu no ta custumbra cu e

sorto di cosnan aki.

E lector ta kere cu a yega ora pa pone camara cu ta filma den e diferente veldnan deportivo pa wak kendenan ta busca problema, mustra esaki na autoridad, y sea prohibi nan entrada ora tin wega, of pone nan un bon boet, y no permiti pa bende bebida alcohólico den e lugar, awa so y coi come, pa evita buracheria den un lugar cu merece por goza tranquil y den paz, di un wega.

E persona aki a fada di mira e faltanan di respet aki y e ta haya cu e tipo di comportacionnan aki ta frena e deseo di sigui haci deporte.

Mercado Reparacion y Servicio
Nos ta drecha

Wasmachine, Frigidaire, Cooler, Dryer, Stoof, Forno.
 Tur tipo di split-unit y window.

ALEX MERCADO! Any time
Cel: 567-0580

Gradicimento y Invitacion

Yiunan y nietonan ta manda palabranan di gradicimento na tur esnan cu di un manera of otro a muestra atencion y cariño durante enfermedad y fayecimento di nos difunto stima:

Ramira Eulogia Wouter
 mihor conoci como Nana,
 Michi, Mama.
 *11 maart 1941
 †2 oktober 2025

Un danki grandi ta bay na Cas Marie, en especial Jeanine, Isabella y Lisette cu a duna cuido y yuda cu tur nan curason.

Gradicimento tambe ta bay na su dokter di cas Dr. Giel y su asistentnan, cu semper tabata cla p'e.
 Un danki special ta bay na tur verpleger di HOH piso B4.

Palabranan di gradicimento ta bay na Pastor Andres, Etienne Yarzagaray y tur esnan cu a compañía nos na ora di entierro. Nos ta gradici Ad Patres Funeral Home pa nan bon servicio. Nos agradecimiento tambe ta bay na Rina's Flowershop pa nan bunita areglonan y nan bon servicio.

Alabes nos famia ta invita famia, bisiaña, amistad y conocirnan pa 3 sacrificio di misa pa descanso di alma di nos difunto stima na misa Sagrado Curason di Hesus na Savaneta.

Diabierna: 10 Okt. '25 7:00 p.m.
Diadomingo: 12 Okt. '25 6:00 p.m.
Diahuebs: ~ 16 Okt. '25 7:00 p.m.

AD PATRES
 funeral home

Van Rensselaerstraat 2
 584-2299 / 737-2299
adpatres@qualityservice.com
 Family owned and operated

CONAR N.V.

"Drenta su portanan cu gradicimento, drenta su tempel cu himno di alabansa"

Staff y personal di CONAR N.V.
 Ta anuncia fayecimento di:



Maritza Josefa Tromp – Sprok
 *18 September 1947 - † 5 Oktober 2025
 (na bida ruman di Sr. Nelson Sprok)

Ta invita tur amigo y conocir pa e acto di entierro cu lo tuma lugar Diasabra 11 Oktober 2025 na Misa Catolico San Juan Pablo II na Tanki Leendert di 9.00 am- 11.00 am, despues saliendo pa santana Catolico na Noord.

Lo ricibi condolencia na Royal Funeral Home
 Diabierna 10 Oktober 2025 di 7.00 pm - 9.00 pm

Cu Maritza sosega na Paz

make HOME yours

Bring Home the Holidays.

Shop Christmas Decor Today! from Oct 10th - 11th

Get
up
to

70% OFF

all Christmas Decorations

Christmas snacks, drinks & gaita music | Descuento grandi!!!



NOW WHEN YOU SHOP, GET CREDIT AT THE CASH PRICE
25% OFF YOUR INTEREST RATE ON ALL PLANS

PLUS FREE DELIVERY
FOR CREDIT CUSTOMERS
LIMITED TIME. SHOP NOW.

NO HIDDEN FEES | NO COLLATERAL | APPROVAL IN 24 HOURS

Promotion Ends October 12th, 2025. Conditions Apply.



569-2407
AMC EAGLE MEGASTORE

HORARIO: 9am - 6pm DIALUNA PA DIASABRA



Ministro di Enseñanza a bay haci bishita na tres scol



ORANJSTAD (AAN): Ministro di Enseñanza, Gerlien Croes, riba Diaranson a bay haci bishita na tres scol na Aruba pa asina papia cu docenten, mira facilidadnan, y haya contacto cu alum-

nonan. E titular di Enseñanza a haci bishita na Scol Preparatorio Kukwisa na Pos Chiquito, tambe a bishita Scol Preparatorio Cacique Aterima na Macuarima, y tambe Cacique Macuarima School na Macuarima.

Na cada uno di e tres scolnan aki, e docente- y alumnonan a ricibi Ministro cu energia positivo y inspirativo. Na final, Ministro Gerlien Croes a splica cu el a keda realmente impre-

siona cu e trabao y dedicacion di cabezante y docenten.

“Mi aprecio pa tur educador y personal di scol pa boso dedicacion continuo den forma e futuro di nos pais; nos alumnonan,” el a finaliza bisando.